

周
易
正
解

周易正解卷十六

豐三三

離下
震上

序卦傳曰。得其所歸者必大。故

則失所而小。歸則安居而大。故女歸必豐。歸妹反漸。不漸則其長。嚙豐所以繼歸妹也。卦以離遇震。震爲長君。君作于上。明燭于下。微曖畢照。故成崇隆。豐大之業。然造物之理。儉則清寧。豐則躁擾。是以宮音數多。而其聲濁。豐于財者多事。豐于謀者多昏。明以運動。動不已則損明。明由靜生也。雷霆喧闐于上。離火燔爍于下。萬物奮興。分疏不已。神勞精竭。委頓而成。

壅蔽如夏日方中。雷雨暴作。陽光晝晦。是以可憂。蓋卦體日在下。雷在上。二至四互巽木爲部。三至五互兌澤爲水。雷施雨。木舍日。故二至四有晦昧之象。聖人處此。虛以養其明。悅以霽其威。斷以決其壅。使上下之情通。若六五動而得中。明良際會。則皎日澄空。氛翳全銷。純熙之運至矣。風雨晦冥。其何傷于日乎。初日始升。二日中。三承震主。其明揜四成震。所以蔽日。五與二相待。所以資明。上則豐極而凶矣。然爻象六二以日中受節。彖謂宜日中何也。二尚于五也。二五皆中。二爲離女。五爲震男。木火相資。電雷配合。故

明動交孚。二日方中。蔽于兩剛。五日正中。則雷霆之高不及日。揜其下而不能蒙其上。彖傳謂照天下。九五來章慶譽。六二有孚發若。此也。故卦體離日有上行之象。至五日中。所以爲豐也。

豐亨王假格之勿憂宜日中

豐者昌明盛大之義。其道亨通四海之遠億兆之衆有幽潛隱滯不得弘闡。卽匪豐亨。惟爲天下之王者能至此豐大。可勿用憂假格通至也。離日方中微暖宣照无憂之時而盛則必衰亦惟此時故曰宜日中。○卦體似重離而缺上日昇至五正中上爲日昃豆

浦曰豐豐之實在上既食則虧故以取象

彖曰豐大也明以動故豐王假之尚大也勿憂宜日中
宜照天下也日中則昃月盈則食天地盈虛與時消息
而況于人乎況于鬼神乎

豐者大也以離遇震離明旁燭于下震雷奮作于上
光明徧照威聲遠播詩云赫赫厥聲濯濯厥靈豐之
謂也王假之者德爲聖人尊爲天子功高業隆故能
上進至此豐大也尚上通卽日中之義指五也勿憂
宜日中者離下震上日受雷節故可憂然王者脩德
致治如六五高明動而民悅光天之下望之如日是

部所不及也。夫何憂所憂者。日中則昃。中不可常保。月盈則食。盈不可常恃。天地盈虛。與時消息。況人生天地之間。鬼神效天地之靈。安能違之時。有盛衰皆鬼神也。所以可憂。惟知昃食將至。而善保之。所謂宜日中也。

彖曰：雷電皆至。豐。君子以折獄致刑。

雷電噬嗑。取其合也。雷電豐。取其并至也。明動并至。故豐。噬嗑。明在上。故先王制爲刑法。以示威于下。豐明在下。故君子洞悉奸僞。以運威于上。動先于明者。慮或未中。故明罰勅法。明而後動者。旣得其情。故折

獄致刑折決也。致詳盡也。折者雷之斷致者離之明。不明亦不能折獄。不斷亦不能致刑。兼資也。當豐而言刑獄者。富而弼教之義。

卦體六畫象豐字。鄉射禮設豐置罰爵也。豐形似豆。名豐者取滿飲也。尚書顧命有豐席。豐蒲草也。震爲草爲稼。詩云在彼豐草。草茂曰豐。年穀登亦曰豐。豐大之時。奸宄潛伏。亂草害嘉穀。不可不除。離爲兵戈。有刑獄之象。卽彖辭憂日中之義。

初九遇其配主。雖旬无咎。往有尚。象曰雖旬无咎。過旬災也。

初九居豐背之下其地幽暗又卦受歸妹歸妹者昧其歸也入豐而遇明故爲遇其配主言就明也配合也主指六二成離之主也日爲羣動之宗動必資明二五居中震男離女內外相對故二稱配主配五也十日爲旬指九四與初敵應自初至四大衍其數爲十離日得十有旬之象初處暗遇明而九居四成雷以揜其明過四則明復故雖旬无咎初日方昇往自有嘉尚勿憚于旬可也有尚指五也象曰由初至四雖旬无咎者雷之節日災止于旬旣過旬災則日中而明遠故无咎

卦象離日上行二五同柔皆離體也二合五爲配二爲離宗故稱主離體親麗剛柔各當位故初爲遇配主二日未昇其明未遠獨初近二得被其光二以上皆有遮蔽之象至四而後漸發遇五乃照天下也二未至而初稱遇五未至而四稱遇皆上行之象至五而稱來日至之象故五爲日中王假之象

六二豐其蔀日中見斗往得疑疾有孚發若吉象曰有孚發若信以發志也

六二以陰爲離主上配六五明方向中九四以震主雷動于上九三近四離火之光不得上炎二蔽于兩

剛之下。故爲豐其蔀。蔀遮蓋也。震爲竹葦。二互巽木。爲高長。濃蔭蓋其上。離日无光。故爲日中見斗。斗星也。震仰虛。似斗。雷電芒昧。有見斗星之象。兩剛中隔。似坎。二欲往五。坎隱。故爲得疑疾。然內明外動。虛中相得。故爲有孚。由明以動。動罔不中。自能撤其蔀。發其蒙。于明體无傷也。故吉。象曰。有孚發若者。二得離中。貞明不變。以其志孚于五。而從容以發其蔽。則疑去而志行。所以吉也。

離火震木。氣本相生。而二五得中。二爲文明之臣。五爲冲順之君。志尤相孚。三四兩剛。爲雷爲雨。爲木。以

月夕正解 卷二十八 五
遮蔽其間。五欲資明而下不得見。二二欲應動而上
不得見五。五震體上行勢雖不能下。而二離日上進
自可以達五。過旬至五。互爲兌主。悅以霽威。毀以拆
部。二五際會。始得配合。如國家全盛。變起倉卒。君臣
睽疑。比及事定。相見如生平。與衰世情形不侔。蓋卦
本似重離。三四兩剛亦與離相似。皆非中正之陽。苟
无二五柔順居中調劑。則豐將成夬矣。安覩日中之
治乎。程朱之說。必以易道貴剛。詆六五陰柔爲暗主。
則何以六爻唯五爲慶譽得吉也。于爻義戾矣。
九三豐其沛。日中見沫。折其右肱。无咎。象曰。豐其沛。不

可大事也。折其右肱，終不可用也。

九三過剛不中，進遇震主，動昏其明。又與五互兌與四居上下之中，其體似坎，水澤交零，淫雨之象，故爲豐其沛。沛，雨盛也。沫，水泡也。音與妹通。兌，少女。震，長男。卦受歸妹，離爲日，爲目，故爲日中見妹之象。有應在上，以柔居動極，過豐而凶。當前爲右，互兌爲毀折。卦似重離，其情相麗。上以柔毀離成震，震倒艮爲手，故爲折其右肱之象。然日方上進，遇沛无損，非爲咎也。象曰：豐其沛者，九三以陽居陽，離明方炎，在豐之時，將照天下。今居沛澤之下，見沫之目，所窺幾何。茫

昧小知不可爲王假尚大之事也。折其右肱者有應在上而毀外離以爲震在離上九王用出征此以窮陰處動之極終不可用爲應援也。

卦體全似離內互大過故三四兩爻居中爲梗而三尤甚亦與離同三四非中爻言日中者二柔進上行三四當內外之中五日正中至上而後日昃也。

大知无知自然明覺六二虛中黃離之真體九三過剛用明之極所以遇動而昏莊生云大知閑閑小知間間日中見昧小明而大暗故不足與慮大事大事卽憂日中之事膏梁之子居豐則明慮患則昏子云

知可及。愚不可及。處多故之時。與肉食者謀。宜其折肱矣。

九四。豐其蔀。日中見斗。遇其夷主。吉。象曰。豐其蔀。位不當也。日中見斗。幽不明也。遇其夷主。吉行也。

九四成震之主。下乘離日。與二同功。二爲明主。動極傷明。故亦爲豐其蔀。日中見斗之象。與初敵應。卽初所謂旬災者也。至旬災過。故爲遇其夷主。老子云。視之不見。曰夷。五爲豐主。動欲資明。蔽于三四。不見其配。故稱夷主。猶明夷之主也。然已過旬災。其明自蔽。故吉。象曰。豐其蔀者。以剛居柔。其位不當。動不以正。

故蔽其明也。日中見斗者。以震雷互巽木。蔽其日光。幽不明也。遇其夷主吉者。二來日升而震上行。出其蔀下。則就明而吉也。

二亦日中見斗。傳獨于四釋之者。四爲蔀主也。日不上往。則蔀終不得出。自初至二受蔀。歷三至四。數始滿旬。故過四及五爲遇。自五視二爲來。撥雲霧而見青天。雲際日出之象如此。卦體所以互爲大過也。觀象玩辭。明主憂勤。日邁月征。保泰之志皆可思矣。明由靜生。故離體虛中。利畜牝牛。二五以柔居中。處豐皆吉。四以陽爲震主。乘九三。明極多故。之日宜其

昏也。所以有豐蔀見斗之象。

六五來章。有慶譽。吉。象曰：六五之吉，有慶也。

六五以柔居震得中，是處豐大，而能恐懼脩省者也。下與二孚，二以日昃受蔀，逾旬始達五，五互兌爲毀折，撤蔀發蒙，以與二遇，晴霄霽宇，日始中天，故爲來章。來，謂二來也。震行爲來，離明爲章。互兌爲悅，災過明全，恐以致福，有慶譽之象。譽與豫通，悅也。此所謂王假之，宜照天下者，故吉。象曰：六五之吉，豐日方中，有福慶也。蓋君道莫大于明，處多故動作之時，无文明之配，何以圖日中？明來則動不昏，保泰持盈，天下

國家之慶也

以明遇動雷電皆至如更以陽剛居五則歷數重華湯武之事非居豐守成者所宜故豐之六五不嫌于柔是太甲成王之儔耳

上六豐其屋蔀其家闕

奎

其戶闕

傾入聲

其无人三歲不

覲凶象曰豐其屋天際翔也闕其戶闕其无人自藏也此彖傳所謂日中則昃也六以陰柔居動上處豐之極動極成憊而反淒寂明極過勞而生昏憤豐極致衰而變彫落故有豐大其屋蔀覆其家闕其戶闕其无人之象下與三應三方豐沛不可得見故爲三歲

不覲之象。蓋物疏則朗，豐則暗。斂則實，大則空。故曰：高明之家，鬼瞰其室。序卦所謂窮大而失其居，震矜已甚，而其見窮矣。故凶。象曰：上六過豐，其屋如天際，飛翔也。闕其戶，闕其無人者，日暮闔扉，夜靜人稀，自藏滅也。如秦皇之爲豐，阿房之爲屋，正合此象。當此占矣。

卦體惟以六居上不成離，故上有日夕之象。震來成艮，艮爲門闕，日夕向晦，有豐屋蔀家，窺戶无人之象。三歲卦三爻之象，闕與覲皆離目之象。三上正應三，在蔀下，上處豐極，日落天宇蒼茫，上不見屋，下不見

人晦盲之境聖人所憂正唯此

旅

䷷

艮下離上

序卦傳曰豐大也窮大者必失其居故受之以旅旅衆也衆在外謂之旅男子有事四方王者有事四裔皆旅而窮大則如遊子喪家秦皇漢武暴師露衆所謂失其居者也蓋聚則成豐散則成旅在豐之上翔于天際反于旅下則瑣瑣耳消息自然所以繼豐爲卦內艮外離山止不遷火无常體有常者居內无常者麗于外旅人之象也居莫如止故以艮爲體往莫如明故以離爲用離者麗也別也別其家麗于外故

曰旅。下卦爲行旅在途之象。外卦爲所至旅邸之象。中互大過爲行邁跋涉之象。四爲旅館。五爲旅人所求以仕占。四猶國都。五猶君也。旅莫善于柔。爻柔者吉。剛者凶。柔而明旅之善物。旅必有求。故爻有得喪。柔則得。剛則喪。初以柔居下旅之微賤者。二柔中故兼得。三過剛故喪。四柔居剛雖得不快。五柔中小費大得。上剛過高大喪而凶矣。自天子至庶人莫不有旅。天子有行在諸侯有朝聘會同。大夫士出疆。庶人商賈營牟皆旅也。語曰。天下攘攘皆爲利往。天下熙熙皆爲利來。此言雖俚可知四民之无不有旅矣。嗟。

夫仲尼之老于行也。夫非以旅之故。與彖傳曰。旅之時義大矣哉。聖人象之卦。開物成務遠矣。

旅小亨。旅貞吉。

旅自豐來。二五皆陰得中。陰小。故爲小亨。處羈旅而能守正知止。則得吉。貞吉而曰旅者。惟足爲旅之貞吉而已。惟旅宜柔。

彖曰。旅小亨。柔得中。乎外而順乎剛。止而麗乎明。是以小亨。旅貞吉也。旅之時義大矣哉。

旅小亨者。旅在外也。爲卦離外。六五以柔得中。麗于二陽之間。以此居外。則无過剛不中之咎。故爲小亨。

所謂旅貞吉者。卦體本止。內有其基。外麗乎明。得所止而不迷于往。故正而吉也。男子志在四方。功業莫不由旅行。藏莫不有旅。在審時合義而已。逝者如斯。天地亦遽廬。人世亦逆旅。則其時義豈不大哉。

象曰。山上有火。旅。君子以明慎用刑。而不畱獄。

火在山上。逐草而行。不能久畱。故象旅。旅人畱滯。莫如獄。君子離明以察其情。艮止以慎其法。使囹圄无淹禁。所以重旅也。離爲兵戈。有刑象。艮止有獄象。艮爲狗。獄字從犬。鄉亭之獄曰犴。犴狗也。狗所以守。故象艮。

卦體內外與賁易位。禮所謂旅賁。有事使四方者也。賁山下有火。君子无敢折獄。火蔽于山下。明未得上。故其獄疑。旅山上有火。上能明察。故其獄當速決也。初六旅瑣瑣。斯其所取災象曰。旅瑣瑣志窮災也。

初六自豐上來。窮大失居。故爲瑣瑣然細小之狀。在旅居初最卑。旅人之无依失所者也。詩云瑣兮尾兮。流離之子。蓋初本无位。六又陰柔。雖與四應。然火上炎而山下止。上无汲引之機。下无進取之志。終止于此而已矣。旅賁健行柔而止。故爲斯其所取災之象。象曰。旅瑣瑣取災。非有別災也。志窮遇困。故災耳。

卦體惟以六居初不成離而初少不變陰小故曰瑣
初又小艮男又小故曰瑣瑣不變故曰斯其所遇離
火故曰災

六二旅卽次懷其資得童僕貞象曰得童僕貞終无尤
也

六二陰柔中正故所至就其次舍抱其資用得其童
僕三者俱而旅道得矣故貞柔中居正有卽次之象
資齎通互巽利市之象以虛承實懷資之象初九瑣
瑣二履之故爲得童僕艮少男爲闍寺象童僕也象
曰得童僕貞者六二柔順中正童僕歸心上下可知

故終能无過尤與五應而得上逮也

九三旅焚其次喪其童僕貞厲象曰旅焚其次亦以傷矣以旅與下其義喪也

九三過剛不中非旅所宜互爲巽木進與火遇有焚其次舍之象爲艮之主而位不中上互爲睽下失二陰睽反家人故爲喪其童僕之象貞此不變危厲可知象曰旅焚其次旣有所毀傷矣在旅好剛童僕解體其所以與下者失義而致喪亡也三以艮主下乘二陰非无童僕六得中而九居三主僕之義失耳艮很也爲艮主以剛居剛在旅成睽欲无喪僕得乎

九四旅于處得其資斧我心不快象曰旅于處未得位也得其資斧心未快也

九四外卦之始爲旅人抵于所往之象旅于處言館其處也陽實爲資剛斷爲斧皆九四所自有故曰得離爲兵戈互兌金爲毀折斧象也下互巽木斧析薪以然離火旅人初至炊爨之象以陽居陰不得其所上互兌悅而初止不應故爲我心不快卦體中似坎爲心憂之象猶諺云長安雖好不如家旅思之常也象曰旅于處者以剛居柔未得位也羈旅恆情所不安无應于內雖得資斧心未快耳

資財貨也。斧器用也。斧斨以樵採。弓矢以禦侮。皆行旅所用。故四言斧。五言矢。

六五射雉一矢亡。終以譽命。象曰：終以譽命，上逮也。

六五居上得中，是旅人所爲遠來求取者也。故有射象離爲雉。三以上互睽爲弧矢，有射雉之象。亡一矢言所費小也。終以名揚被寵命，言所獲多也。五君位故爲命。遠人得上逮，惟以有人爲之延譽耳。求必有費。亡一矢而得譽命，旅人之吉莫大乎是。其猶士之載贄出疆而遇主者與。一矢亡離中畫虛之象。譽互兌之象。命互巽之象。象曰：終以譽命者，名譽升聞故。

上命逮及以下應六二之中正也

孔子當春秋時老于行雖未得位所在邦君敬信恭已下問其賢士君子爭師事之孟子周游齊梁魯衛滕宋之間後車十乘從者百人以傳食諸侯皆所謂射雉一矢亡終以譽命者也

上九鳥焚其巢旅人先笑後號平眺喪牛于易卦象曰以旅在上其義焚也喪牛于易終莫之聞也

以剛居上亢而自尊在旅必招災旅極忘歸故其占罔終巢所以栖離火炎上互巽爲木爲鳥故有鳥焚其巢之象陽明好上喜于自遂故先笑炎極終滅故

後號咷笑號皆火象。牛所以服車。離爲牛。卦體中似坎爲車。周書云。肇牽車牛遠服。賈大傳云。服牛引重致遠。皆旅人所必資也。喪亡也。易猶忽也。在旅居无巢行无牛。故凶。卦互大過有死喪之象。牛旣喪矣。其人可知。詩云。爰喪其馬。于以求之。于林之下。亦戰士旅亡者也。下无正應。火在山上。无所附麗。忽然而滅。旅窮不反。沈沒他鄉。遠人无家滅亡。其象如此。象曰。以旅在上。其義招焚也。喪牛于易者。客死于外。靡室靡家。終莫之聞也。故雜卦傳曰。親寡旅也。

巽二二巽上

序卦傳曰。旅而无所容。故受之以巽。巽者入也。雜卦傳曰。親寡旅也。能巽則无入不親。强梁傲僻則一物无所與。故旅受之以巽也。爲卦一陰伏于二陽之下。陽之于陰。情本相得。而陰又能下。其入陽也。陽俛然聽之。一陰爲主。二陽俯從。故巽之陰能權能制。非怯懦之陰也。其取象于風。何也。物虛而善入者。莫如風。卦畫一偶象虛。居初象入。風之乘虛甚微。而人不覺。陰之巽陽亦甚微。而陽不覺也。其取象于君命。何也。命有聲无形。風亦有聲无形。然而撓萬物者。莫疾乎

風風行而萬物鼓舞。令出而萬民率從者。惟其順也。
虞舜好問好察。適言不違。用中于民而後四方風動。
故善令民者。卑虛以察閭閻之情。然後從容曉諭。命
既申。然後畫一遵守。以考厥成。所謂剛巽乎中正而
志行。六四所以有獲。九五所以无不利也。故易戒于
用剛。而用剛莫善于巽。六爻多吉。惟上九凶者。失其
所以爲巽也。其所以爲巽者。謀也。初之進退。二之紛
若。其謀審。故其命順。謀不審。是非不明。可否不衷。徒
以甘言爲驩娛。誰其順之。不巽之咎。起于自用。故下
卦謀順出命。上卦行命爲事。初志疑不斷。二詳審折。

衷三不中正不能謀又不能斷四以斷有功五制命
中正而志行上巽懦无能甚于三其究爲躁故凶巽
者選也與算通算故能權權者謀也巽稱而隱非唯
諾諂奉之謂也天下之至柔馳騁天下之至剛爻辭
曰武人曰田獲曰資斧其象爲高爲長其究爲躁故
巽非徒柔也陰陽剛柔非截然二也氣陽而已陰者
陽之靜機柔者剛之順機以陽乘陽則陽无所施以
剛用剛則剛无所入陰虛以承陽柔順以用剛故心
之精神爲陽心有所謀則斂而內入此陽欲思慮假
陰爲收斂耳思非自陰出也心有所悅則出而外見

此陽欲發舒。假陰爲和柔耳。悅亦非自陰出也。故兌上一陰爲陽之悅。巽下一陰爲陽之謀。非剛柔分也。然陽道上行。悅出則易。而陽氣剛勁。順入則難。故用剛莫如巽。此彖所以謂之小亨也。然則九五之象云。先庚後庚。何也。巽與兌相往來也。巽位東南。天干甲木。兌位正西。天干庚金。木柔而能剛。故從直。金剛而能柔。故從革。木性上遂。歸根于土。故順下。金性下沈。利于致用。故悅上順。故從繩。而理解。悅故從革。而響利。巽時爲春。兌時爲秋。萬物齊乎巽。悅乎兌。一出一入。一始一終。而天地西南之用畢。二卦相資也。金反

爲木則爲後甲故隨之兌反爲蠱之巽而兌爲先甲
自秋歸春有事之象也木反而爲金則爲後庚故巽
之上反爲兌之下而巽爲先庚自春之秋悅利之象
也巽入而隱伏則不悅以反兌兌出而毀折則不順
故反巽然未有不順能悅者金未有不資木能利者
故巽以陽順陰而來下兌以陽悅陰而往上往來屈
伸自然之法象也然巽在他卦多矣獨此九五言先
庚後庚何也重巽者巽之經九五者巽之申命主也
巽之不爲蠱者徒以九五一爻耳聖人戒人主制命
于未亂因以蠱之彖辭爲巽之爻辭在蠱振飭更新

治亂相循故先甲後甲終則有始在巽勿勞更始惟
申命行事先庚後庚无初自有終矣蓋甲有初庚无
可爲初庚後三日以癸終耳詩云不愆不忘率由舊
章先庚後庚无初有終之謂也苟顛覆自用以爲命
與委靡阿順以爲巽皆非申命之治而盡且至矣爻
所以戒九五也

巽小亨利有攸往利見大人

陰爲小巽得陰而亨也初陰入于二陽之下陽得陰
順其道亨通順而入何往不利陽剛中正之主以此
道申命行事詩所謂辭之輯矣民之洽矣聲教四訖

天下風行草偃大順之化成故曰利見大人卦中九五

是也

八純卦自乾坤而後爻象之善莫如巽蓋易戒過剛順者德之至善故曰君子之德風能風則德之所及遠聖人憂患作易論九德終之巽以行權士君子能權則盡道矣故巽者士人之資斧世儒說易動稱剛守一隅而不通大方可以爲易乎

彖曰重巽巽以申命剛巽乎中正而志行柔皆順乎剛是以小亨利有攸往利見大人

以巽遇巽故曰重巽下而入命令之象也重巽故爲

重申命令卦雖柔順二五皆剛巽而得乎中正所命當理中外大順故其志行爻雖无正應而陰皆承陽上下二柔皆順乎剛柔以濟剛中正以濟剛柔巽所以柔而得亨也以此申命行事利有攸往天下利見大人矣一陰為主在下有志通民隱之象

象曰隨風巽君子以申命行事

巽爲風重巽爲隨風以風隨風順入之至故爲巽風无形而及物遠君命及民亦猶是也君子以此道重申其命令丁寧告戒然後行事則上下遠邇畫一耳目心志大同无始終二三之梗而風行天下君子所

爲隨風也

初六進退利武人之貞。象曰：進退志疑也。利武人之貞，志治也。

以陰居初，上承二陽，其入深，其謀隱，躊躇顧慮，爲進且退之象。上无正應，互睽居中，故疑而不果然。好謀貴斷，武人立功，惟貞乃成。蓋其以一陰主二陽，人見爲柔而不知，至有權力者，巽之初陰也。鷙鳥將擊，則必戢。虎豹將搏，則必伏。若疑而不果，反害事，故利武人之貞。巽爲躁卦，互兌爲剛，自武人之多虞，之下武人也。象曰：進退者，巽欲權而其志疑也。利武人之

貞者果行而其志治也。疑故當理而其命順。治故有功。而其事行。

巽本乾體健而上行。一陰初入其下。天行之力。全凝而爲履霜。如人沈思研慮。欲揚且抑。陽氣翕縮在下。虛而至健也。故巽之陰爲機權。非虛怯无爲也。是以象武人象資斧。

九二巽在牀下。用史巫紛若。吉无咎。象曰。紛若之吉。得中也。

二以剛居柔得中。故善慮好謀。巽木乘偶。有牀象。二據牀上。初居牀下。初爲謀主。二俯聽之。反覆諮諏。或

可或否。爲吉爲凶。史卜巫禱紛然交作。體互睽。有鬼
象互兌。有巫象禮。所謂前巫後史。皆在左右是也。集
思廣益。故吉无咎。象曰。衆議紛紛。然能吉者。九二得中。
好謀能斷。權其可而布之。命不如初。進退失中也。
九三頻巽。吝。象曰。頻巽之吝。志窮也。

九三過剛不中。居下之上。无初之志。无二之謀。處巽
之時。矯強爲柔。屢失而頻巽。羞吝之道也。象曰。頻巽
之吝。唯唯諾諾。惟有卑順而无心計。其志窮也。蓋巽
道下入。行權在初。過中至三。陽剛虛憍。无復深慮。有
詭隨而已。

六四悔亡。田獲三品。象曰：田獲三品，有功也。

四重巽爲申命行事。以陰居陰，巽順之至。上近五，爲大臣奉君命布下之象。下卦三爻所命，皆于四行事。與初敵應，初不正而四得正。上同五，故悔亡。初用武人之貞，故四田獲三品。互離有田象，三品謂所獲上中下殺三等之禽。象下三爻也。九三過剛，象乾豆。初敵應，象賓豆。二應五，象君庖。蓋初慮而四行，算无遺策。其象如此。象曰：田獲三品者，申布舊令以行事，有功也。四與初雖同爲成巽之主，初以陰居陽，其八疑故進退有悔。四得正，故不疑而悔亡。初在下未行事。

故利武而罔獲。四當事故有武功。所以傳于初言志而四言功也。

巽下一陰震下一陽皆成卦之主。重震初吉而四遂泥。重巽初疑而四有功。何也。剛得初柔得四皆正也。陽在下其出壯而重出則力衰。陰在下其入深而再入則謀審。故夫巽者順而能下。入而能隱。其權制在初。故曰巽在牀下。巽而上則頻而吝。再上則喪而凶。不下不可爲順。不隱不可爲入。

九五貞吉悔亡。无不利。无初有終。先庚三日。後庚三日。吉。象曰九五之吉位正中也。

九五陽剛中正居尊制命所謂風之自者也當巽之時獨秉剛中得正故吉凡所命所行慮之已審謀之已詳行之有功君臣相得无爲而治順之至也故悔亡无不利巽風順入行所无事不必從新更始但申令而行自能有終非如幹蠱者先甲後甲終則有始也巽之不爲蠱者惟以九五一爻蠱因隨致故幹蠱以治隨反隨上爲蠱下有終甲始甲之象在巽大順之世令出民從以入爲悅巽往兌來先庚後庚而已矣巽木爲甲兌金爲庚甲爲干始庚非始也後庚三日以癸終耳故曰无初有終餘詳卦下象曰九五所

以貞吉悔亡无不利者。以位正中故申命行事。而天下風動。彖謂利見大人剛巽乎中正而志行。此也。

孟子云。仁言不如仁聲入人深。巽風之謂也。王者有仁聲而天下順之矣。巽五與四剛柔得位而志合。君制臣行。上令下從。與幹蠱紛更之事殊。故以蠱卦之彖辭爲巽五之爻辭。蠱非更新不治。巽則申命卽行。故蠱有初巽无初。先庚後庚云者。因先後甲以爲无初之象耳。非如世儒之鑿說也。

上九巽在牀下。喪其資斧。貞凶。白巽在牀下。上窮也。喪其資斧。正乎凶也。

巽道下入。牀下。指初也。巽初爲謀主。上九居重巽之終。去初遠。故曰巽在牀下。言不在上也。陽剛爲斧。陽實爲資。資爲謀。斧爲斷。无謀无斷。當巽不能爲巽。居剛无所用剛。虛憍恃氣。其究爲躁卦而已。故貞凶。象曰。巽在牀下。在上則窮也。喪其資斧。斧所以爲剛。正上九之正。乃所爲凶也。蓋詭隨者。常虛張爲剛。順理者。不欲多上人。則其爲資斧可知也。木數仞以上。根不能潤其顛枝。不能庇其本。善巽者。小心翼翼。慮以下人。反求其根本而已。正卽貞也。

志下則其養深。慮入則其見定。未有操心不下。能慮

事制行者也。士切切惔惔。怡怡慮以下人。則行无不順。露才揚已。昂視高步。其神不守。遇事盤錯。志沮氣喪。彼所謂能謀能斷。瞽然以爲是者。皆危亡之道也。輕躁淺浮。本无所得。何資斧之有。

巽爲市利。資象也。爲木互離火。四以下互兌金。爲毀折。斧析薪之象也。在旅九四互兌巽居中。故爲得其資斧。此上九過高居互兌之外。故爲喪其資斧。

兌三三

兌上

序卦傳曰。巽者入也。入而後能說之。故受之以兌。兌者說也。兌反巽。巽二陽在上。一陰下入。故陽順而下。

來兌二陽在下。一陰上出。故陽悅而上往。所以反巽。其象爲澤。何也。坎以陽實陰中。故象水之行。地兌以陽承坎下。故象澤之瀦水。其德爲悅。何也。兌西成利。美而和。其氣爲金。從革而新。其決斷快利。其音響鏗鏘。澤含水則草土生。潤納衆流則淨垢兼容。皆悅之象也。又其體本乾。而陰氣三索之餘。剛強銷爲綽約。陰出于頂。娒媚之態見而爲少女。女少天治。亦悅之象也。巽木。春也。離火。夏也。兌金。秋也。天以三時生物。齊于巽。悅于兌。木氣發生。金氣收斂。故巽兌相反而相成。中皆互離。三時相因。生克自然之象也。大抵悅

之爲道與聖人憂患之志違故悅不以道君子不悅
以上悅下賢君所以宜民以下悅上小人所以蠱君
賢君宜民悅以剛小人蠱君悅以柔卦內四剛皆君
子二柔皆小人初九民悅君終事者也九二賢人以
道悅君者也六三小人非道求悅者也九四大臣爲
君遠小人者也九五衆所悅而求附者也上九君側
爲容悅者也三上兩陰成悅三介于四而不得進上
爲之引欲以悅五而五陽剛中正與四同心知上之
奸而剥膚憂之所以上窮于悅終不能剥也自非九
四介疾于下九五孚剥于上小人內外比周伺隙而

月 卷二十一 二十四
動鮮不受害矣。是以聖人思剛而惡夫有愆者。君子
難悅。有終身之憂。此也。

兌亨利貞

兌悅也。悅則亨矣。然利于守正。不然。非道之悅。烏能
亨。柔在外爲利。剛在內爲貞。離巽兌三女。皆言貞。

彖曰。兌說也。剛中而柔外。說以利貞。是以順乎天而
應乎人。說以先民。民忘其勞。說以犯難。民忘其死。說之
大民勸矣哉。

兌者悅也。悅本柔情。而二五陽剛得中。陰皆在外。內
正直而外和悅。悅以利貞。非苟悅也。是以明君之爲。

悅。上順天命。下應人心。爲大悅也。身先勞民。民悅而忘勞。蒙犯大難。民悅而忘死。天命順。人心應。是悅之大者。民豈有不勸哉。

象曰。麗澤兌。君子以朋友講習。

麗。相附也。兌爲澤。兩兌故爲麗澤。謂交相潤澤也。其象爲口。兩口對語。有講論之象。相麗有重習之象。朋友講習。悅之至也。講明習熟。義理融洽。則潤澤矣。子云。朋來時習。君子之悅也。

初九。和兌吉。象曰。和兌之吉。行未疑也。

初九。以陽居悅之下。賤而无位。上无係應。處悅之始。

與物无競爲和而已。兌正秋其德爲利義之和也。故爲和兌以此居下吉之道也。象曰和兌之吉者初去悅主遠行未有可疑也。蓋六三以陰爲內悅之主所悅者初與二也。初重剛居下而遠故行未可疑曰未疑則固有可疑者矣。以其同體也。曰行則其志未可知。以其不中也。若二中故信志。

以陽居初本過剛惟其體悅故能无暴戾之失。學者剛則近仁有所悅則慾動而志疑。初陽方剛物欲未雜其心不亂此悅道之初念也。與四敵應至四商兌則未免疑矣。

九二孚兌吉悔亡象曰孚兌之吉信志也

九二以悅居內得中蓋士之樂道自好者外比于悅主而內自信于心故爲孚兌所悅在已勿羨于外故吉雖失宜悔而有孚可亡象曰九二孚兌吉者惟其自信已志也苟其志不貞近比于三未有不爲悅所動者矣

九二以剛失位在澤之中所謂幽人也得中故爲孚兌卽大象以朋友講習好學悅道之士遇窮而志可信如顏子不改其樂是也二孚以志五孚以位二位不當而志則可信五志可信而位適相當雖匪正應

以剛居中其德同也。二雖與三同悅。所孚在五。五雖與上同悅。所孚在二。故皆曰孚。

六三來兌凶。象曰：來兌之凶。位不當也。

六三陰柔不中正。成兌之主。上下四陽而一陰處其中。下卦二陽而一陰據其上。有喜悅相招呼之象。兌爲口。來相呼聲。爻辭亦若驚其來而防禦之也。聖人于陽來以爲常。陰來則驚。陰來陰上以爲常。陰來陽上則懼。蓋三本乾體。君子終日惕厲而忽變爲悅。故曰來兌。進互巽。將以入五。應上爲剝。其來可畏。巧佞來正直傷。故凶。象曰：來兌之凶者。以柔居剛。其位不

當非道而悅是紛華外至奪耳目之官者君子所以防其來也

九四商兌未寧介疾有喜象曰九四之喜有慶也

九四以陽居陰未爲當位然在悅之時惟剛爲正下當兌主之來而四上承九五同德相悅陳善納誨不敢安寧故爲商兌未寧之象商議度也秋音爲商兌象六三挾巧佞之術觀望于上下之間爲疾四以剛互離居間以燭其奸故爲介疾有喜四五似坎體疾象互離火喜象象曰九四之喜非私悅也佞人遠則正直親天下國家之慶也

以學占。四與初敵應。初行未疑。至四涉世深而紛華外至。四以剛敵應。相與講習商求。所謂直諒多聞之士。以友輔仁者也。

九五孚于剝。有厲。象曰。孚于剝。位正當也。

中外所窺伺者。一君耳。小人觀望求悅者。亦一君耳。九五居尊。六三爲悅于下以求同。九四爲之介。然上與三比德。五與上同體。上招引同類。與五切膚。是五雖有介于下。而不能无剝于上也。然五以剛中。專精致誠。以防其奸。故爲孚于剝之象。兌伏艮有剝象。巧佞孔壬。聖人畏之。雖无凶而有厲也。象曰。孚于剝者。

人主居崇高不與悅期而悅之者至其居使之然也
五陽剛中正與上同體所以憂佞人而有危厲耳然
明主方精誠勵志小人烏能投間而悅之

凡好善惡惡由中曰孚大學謂誠意如惡惡臭如好
好色是也兌體陰柔居外三來上引悅自外至者也
有孚在中則內重而外輕子云主忠信卽孚也君子
有忠信之心則誠立而耳目聲色之欲寡故曰孚于
剝

上六引兌象曰上六引兌未光也

卦以二陰成悅之主三悅于下欲進而介于四上與

三相助爲黨三呼而上引九四阻之而上六牽之故
爲引兌兌伏艮爲手居上有引之象象曰九五陽剛
中正誠信防奸非小人所能移然以巧令之輩密邇
君側內外比周其于五位豈能光大无蔽乎剔垢去
蔽非五剛中不能矣

周易正解卷十六終

周易正解卷十七

渙

巽上坎下

序卦傳曰。兌者說也。說而後散之。故受之以渙。人情有鬱結。能悅則散。詩云。泮渙爾遊矣。優游爾休矣。天下之害。莫甚于鬱結。凡人身血氣不調。則疾作。憤懣不舒。則爭成。渙者所以調其適而舒其憤也。人心不渙。則有固我。國家不渙。則有梗化。朝廷不渙。則有朋黨。天地不渙。則有否隔。王者不渙。則有偏頗。故君子周而不比。和而不同。羣而不黨。渙之謂也。渙于心則忘物。渙于事則順理。渙于治功則泰平。渙于王者則

至公故銷天下之亂而解萬事之盤錯莫如渙造物
有自然非人力可強強天下之合而與之爭縮天下
之畔而使之合猶抱薪救火治絲以棼也故小罅可
塞大惑難解聖人以不解解之行所无事則紵結自
開故曰君子之於天下无適也无莫也莊周謂藏天
下于天下而不得所遁渙之謂也故渙无爲也彖云
王假有廟无爲之象也或者謂渙爲分崩故聖人設
卦以濟渙夫風以散之造化所以成功也謂渙不美
而求所以濟則風其天地之惡德與卦取巽爲風爲
木坎爲水所謂險難風波也然風之行水飄然而往

水怒而風无心。水之善沒也。物不敢加。惟風過而不
畱。惟木浮而不溺。風行水則清。漣成文。木得水則枝
葉生潤。故水遇風木則失其險。君子所以渙爲貴也。
卦本乾坤否。坤往居四。乾來居二。則否通。風戾濕。乾
水滋木長。則險化。蓋坎水居比爲生物之祖。停毓至
于東南。木氣發生。散爲品物。自二至四。體互爲震。震
出巽齊。木道大行。坎水疏瀹。達于離火。再過坤土。濕
逢其燥。皆所爲渙也。渙與萃名相反。而實相須。人精
神收斂。自然蕭散。思慮放逸。則生凝滯。守中抱一。則
霧消冰釋。天地清寧。萬物得所。故彖曰。王假有廟。恭

已无爲。則化馳若神矣。是以初六遇險而順。二以陽來險而脫。三臨險而忘身。四成渙而忘人。五居尊而忘天下。上超然遐舉。遠害之至也。遠害莫如渙。書曰。爾惟不矜。天下莫與爾爭。渙以柔爲道。三陰最吉。三陽次之。說者謂易用剛一曲之見也。

渙亨。王假格有廟。利涉大川。利貞。

渙散解釋。自可亨通。王者假廟則凝神合漠。无言靡爭。渙之至也。順理忘私。履風波如平地。故利涉大川。然必貞乃利。王假有廟。貞之至矣。

古者祖廟在國東南。祭必以血。巽爲東南。坎爲血卦。

有假廟之象。上卦爲木。三五互艮爲宮闕。有廟象。坎
隱伏。有鬼神之象。坎水有大川之象。

彖曰。渙亨。剛來而不窮。柔得位乎外而上同。王假有廟。
王乃在中也。利涉大川。乘木有功也。

所謂渙亨者。乾以剛來居二。得中爲坎主。而險不能
困。坤以柔往外居四。陰得陰位。九五陽得陽位。是上
同也。往來不窮。剛柔得所。是以亨通。所謂王假有廟
者。五以剛中居尊。肅雍清穆。如承大祭。中心无爲。渙
之至也。利涉大川者。坎水在下。巽木風行于上。以順
處險。渙然解散。是以有功也。

渙以紓患解難爲義。猶蹇之有解也。坎險在內外互艮爲蹇。遇巽木生風。風戾則濕乾木浮則險濟。乘艮爲漸。則鴻飛皆渙散之象。內體自初至四互解以助渙。而坎失其險。故六爻惟初入坎未能遂渙。二以上皆解散无險象。所以渙也。如程朱之說。欲救散濟渙。則是處險爲宜。而解險爲无功。有是理乎。

象曰。風行水上。渙。先王以享于帝。立廟。

巽風行于坎水之上。水靜風散。故爲渙。先王觀于風之虛。得鬼神之象。于坎之盈。得祭祀之象。風无形。惟水波文漣淪。乃見風非水。則風不可見。鬼神无形。惟

郊廟焄蒿悽愴。乃見鬼神。非郊廟則上帝祖考不可見。聚則爲有。散則爲无。鬼神之情狀。猶風行水也。人心誠敬所聚。莫如鬼神。先王當大難。初定人心未寧。享帝告成功立廟事祖考。以收拾人心。亦渙之義也。巽象廟坎象享。中互震象帝。

初六用拯馬壯吉。象曰。初六之吉。順也。

以陰居初在險之下。未能遂渙。進與二比。二在險中。故爲用拯。處渙利柔。而初體本坤。坤爲馬。初少陰。故爲馬壯。可用拯。居險不爲險。又從而拯之。盡渙之道。所以爲吉。象曰。初居坎下。本甚險。處渙不發難。而以

坤承乾惟恐陷順之至也水逆則險順則渙風在上而坎水下流亦順之象也

諸爻皆言渙獨初殊者初始入險非險无渙非拯不成渙初遇險卽拯故二以上无險所以爲渙

九二渙奔其机

几

悔亡象曰渙奔其机得願也

九二自乾來居險中處渙之時初以順易險承藉于下上遇重柔互爲震主動以破坎木氣乘風水遇雷解故五因初馬壯而奔往從五震爲足有奔象五巽木乘震足有机象机几通牀屬所以爲安也去危卽安渙之象也以剛居柔上元正應在險宜悔然坎水

遇解其悔可亡。象曰：渙奔其机者，二五雖非正應，二本自乾來，與五同體。今往赴之，剛中相得，在渙不欲應，自得所願也。彖傳謂剛來不窮，以此

禮下殤，輿机而葬。机以木爲之，有足。五以机乘偶，故有此象。程朱之說，以二就初爲奔机，是甘沈淪于險下也。二比初，不得言奔。坎下陷，不得言机。義不合象，非易之辭。

六三：渙其躬，无悔。象曰：渙其躬，志在外也。

六三居坎上有欲遠害未得之象。俯身曰躬，下臨險之象。互艮爲背，有躬象。三爲人位，人情所以患險不

能渙然无累者。爲有身耳。三不中正。乘坎互動止之。交不得釋去。遂欲忘身。肆志于形骸之外。支離以求脫。雖不中正。處渙亦可无悔。象曰。渙其躬者。六爻惟三有應于外。志欲同上。遐舉以遠害也。

老氏謂身爲大患。遂欲墮肢體。黜聰明。槁形灰心。謂吾喪我。卽此爻義也。聖人守身而无我。克己同人。如六四之光大。九五之正位。散一身爲萬物。又何形骸之足拘乎。凡二氏菁華。皆易道之糟魄耳。

六四。渙其羣。元吉。渙有丘。匪夷所思。象曰。渙其羣。元吉。光大也。

卦所以成渙者。剛來二柔往四也。二來則險。四往得位。故四爲盡善。盡所貴渙者。解其羣離其黨也。黨成則世否。六四不來。則九三不往。乾坤不交。而小人道長。四來而後否散。方其居坤也。與陰爲羣。今以其直方大之德。超然登庸。得正上同。近不比。三下不應。初故爲渙。其羣其來也。爲巽主。承命宣化。視二來不窮悔亡。尤爲元吉也。然二四本相成。剛得中而柔止于四。何也。五以剛居尊。互爲艮主。有丘象。艮爲止。四所以止不進者。避五之尊也。柔得柔位。是以上同元吉。進則成未濟。四不爲未濟者。爲五也。非爲遲所思之。

人也夷遲通待也所思謂九二坎心有思象二來奔
机四同功有待象處渙之時二既渙羣舍多譽而就
多懼又何係于二乎象曰渙其羣元吉者四能邁衆
絕類離坤之朋出坎之隱得渙道而光大也人臣如
四可謂公爾忘私矣巽爲高長有光大之象

夷字古遲通猶陵遲之言陵夷也書盤庚遲任有言
亦作夷任

九五渙汗其大號渙王居无咎象曰王居无咎正位也
九五陽剛中正以居尊位所謂王假有廟者也一人
之身渙爲兆民一人之心渙爲萬幾巽命一申則風

行四海興利除害朝施而暮訖如元氣藏于包絡汗
發于腠理百竅宣暢疣痼頓起故爲渙汗其大號蓋
王者中天下而立无私居也畿甸非近要荒非遠匹
夫匹婦以爲身四海九州以爲宅合則一體散則萬
方是爲渙王居所以號發四達如汗出于心而浹于
四體也王者以此行命宣化何咎之有象曰渙王居
无咎者陽剛居五正得其位居天位以渙大號解難
消否正惟其事故位者聖人之大寶也

五乘互震又互艮以止巽爲賴艮爲背中互頤故有
汗出之象大號巽命頤口之象王居艮止之象

上九渙其血去逖出无咎象曰渙其血遠害也

上九以陽剛居渙之極下應坎三渙道惡坎賤應然卦所不爲習坎者惟以九居上故爲渙其血坎爲血陰氣之凝滯者也渙血則坎氣消盡矣懲險思脫下惡險應陽剛決絕巽風高舉出不內顧故去而遠出視王假有廟者未免過中然見害懸解處渙亦爲无咎象曰渙其血者世路坎壈險在下遠去而離害也○世路无往无險達人无地非渙子云鳥獸不可與同羣吾非斯人之徒與而誰與君子素位循理則无入不得故初見險能拯則順而吉二避危就安則悔

亡三患身求出四爲臣不私五爲君至公涉世異趣
其爲渙同皆善乎能自解矣若沮溺之固僻老莊之
之荒唐佛氏之毀滅清譚之任放厭人世爲樊籠毀
衣冠爲牽纏至欲寄愁天上埋憂地下叛散禮樂滅
裂風雅所謂渙血逖出以遠害而于聖人之教悖矣
易道所以包括萬有而儒者爲濟渙之說非設象之
義矣

節

三

兌下

序卦傳曰渙者離也物不可以終離故受之以節節
者節其散也人情鬱結則不可不散旣散則不可不

節渙自否來渙則否消節自泰來節則泰定爲卦澤
下水上物行有節莫如水盈則進坎則止能節水者
莫如澤平則受滿則溢故曰節節之取象義非一端
卦位自坎適兌逆行互巽居中木口故困由兌適坎
順行互艮居中艮止故節澤之水止坎之水行二與
四互震震亦行五與三互艮艮亦止是爲行止有節
又兌爲悅坎爲險人情悅則過度險則思節又坎爲
酒食兌爲口中互爲頤君子以節飲食養生莫如節
又兌金生水坎水資金金生于西水歸于北生之有
常用之有節又乾坤至此卦凡六十六者天地之

大數亦節也。水性流，強止則拂，澤受衆流歸而不拒，
滿而不積。其道常悅，旣爲金以生之，又爲土以制之。
金悅土和，甘而不苦。故中節莫如澤。子思曰：喜怒哀
樂未發謂之中，發而皆中節謂之和。有子曰：和爲貴，
不以禮節之不可行，故節以致和。和以中節，不中不
和，不可爲節。節字从竹，竹有節以止其通通極而塞，
塞極而通通塞適均，乃謂之節。在心爲中，在事爲幾，
中不容一毫少偏，幾不容一息少待中偏則害德，幾
失則敗事。事物各有節，故曰有物有則則者節也。聖
人從心不踰矩，矩者節也。仕止久速无可无不可，仁

敬孝慈于止知所止聖人之節也日月往來寒暑代謝四時以序歲功以成天地之節也其有常有漸流行坎止易見者莫如水與澤故聖人下襲水土而卦取象于坎兌也爻剛柔各半當位則吉陽實陰虛實塞虛通以象竹通者爲空塞者爲節初宜塞二宜通三宜塞四宜通五宜塞六宜通初宜塞陽當位故吉二宜通陽失位故凶三宜塞陰居陽故嗟无咎四宜通陰得位故安亨五宜塞陽得位故吉六宜通而處節之極陰虛上无所蓋藏節而无節是謂苦節非中和之道亦凶大抵易道戒盈節以防盈防之過而遲

疑以敗事。纖嗇以廢禮。違天時。拂人情。較之縱欲敗度者。雖有間。以易道時中律之。均爲凶咎耳。孟子所以推時中爲大成。隘伯夷。惡陳仲子。巢許之事。六經不載有以也。

節亨。苦節不可貞。

節制也。凡事有制。亨通之道。節者時中而已。中節之謂和。強塞則苦。拂人之情。不可以貞。

不節非節也。過節亦非節也。言節卽言不可苦節。易道變通類此。

彖曰。節亨。剛柔分。而剛得中。苦節不可貞。其道窮也。說

以行險當位以節中正以通天地節而四時成節以制度不傷財不害民

所謂節亨者剛柔分也剛得剛位柔得柔位則節成如初四五是也得位又貴得中得位得中又貴以剛剛所以爲節也九五剛得位又得中大君所以制數度議德行節制天下也故亨苦節不可貞者節和則甘節過則苦苦則人不堪而其道窮然節何以不苦也卦以兌遇坎悅以行險人情悅則不苦險則知節剛柔各取當位非強塞也九五中正以通天下之情无矯世之法節而不苦亨而不窮之道天地以此節

五氣而成四時。聖王以此節制度而省費愛民。節也。豈苦不可貞之謂乎。

象曰：澤上有水，節。君子以制數度，議德行。

下兌上坎，故爲澤。澤上有水，澤受水有節，故謂節。君子觀水澤之象，知禮詳于數，辨于度，而制數之多寡，與度之隆殺，道具于德，體于行，而議德之偏全，與行之過不及，皆所以適于道之中而爲節也。

初九不出戶庭，无咎。象曰：不出戶庭，知通塞也。

初九陽實當位，是爲初節。九二以陽實塞其前，初出无所往，險應在外，往則犯難，故爲不出戶庭之象。處

節之時雖不利往可以无咎。象曰不出戶庭者在節之初防險慮終從容審時通則行塞則止未潰而先議防所以无咎。

門戶外地曰庭互艮在上爲門闕故有戶庭之象兌于時爲酉有闔戶之象戶單門拆凡奇在前象戶偶在前象門戶內門外故初爲戶二爲門也卦自渙入節將整離散議制度故宜愼密慮周險夷其苦通時則垂創可久語云閉門造軌出門合轍通則宜行塞則宜止如二中則當通三過則當塞二以上互震動三以上互艮止皆通塞之象辨之皆在初也。

九二不出門庭凶象曰不出門庭凶失時極也

初爲節二宜通坎水下流二以陽實中塞與五敵應互爲動主五亦互艮以止之故爲不出門庭之象以此執節坐失機會凶之道也象曰九二居中不出凶何也節者時而已時塞宜塞時通宜通二時可以通蓋九五陽剛中正爲制度之主在初无位故不得當五二當五則初之所慮者可行矣有君如此不能應時達節宜出不出失時之極是以凶也

二互震于時爲卯有闢戶之象震將旦而門不啟故其象凶二變則成屯君子所以經綸今不動而塞故

爲失時。初與二皆互震。初待二。故知通塞。以通塞在二也。二不通。則節遂成。故曰失時極。言初失時。二尤失時極也。

六三不節。若則嗟。若无咎。象曰。不節之嗟。又誰咎也。二宜通。三陽位宜塞。而六以陰虛居之。兌體毀折。有不節之象。然處節之時。未有不節者。三又成節之主。與五往來同功。受五之節。而自以毀乾。不節爲憂。嗟憂嘆聲。兌口之象。爲悅主。而憂不節。則自知節矣。故无咎。象曰。不節之嗟。又誰咎。蓋真无節者。悅而不憂。三旣以不節爲憂。自能補過。无傷財害民之咎矣。

兌爲口。三適當毀折之位。互爲頤。君子所以節飲食也。外遇坎爲酒食。三動變需。君子所以飲食宴樂也。故有不節之象。坎爲憂心。有嗟嘆之象。三自坤來成兌。有水歸澤之象。五自下往成坎。有澤節水之象。三當水澤之交。爲悅。淺深斟酌。悅以受之。不必苦貞。但嗟若。卽是知節者。

三五往來成卦。五坎滿而甘。三毀折而悅。故其象爲不節。幸其處節之時。五爲度數主。當位以節。互艮以止。三受其制。悅而知止。所以懼而嗟若也。程朱之說。謂三真不知節。非也。豈有失節之士。爻辭謂无咎者。

乎

六四安節亨。象曰：安節之亨，承上道也。

四陰位宜通六以陰虛當位。坎水下臨澤畔，水土相得。互艮見險而止，下應兌初爲安節之象。以柔承剛，以臣從君得位而上同。故亨通。象曰：安節亨者，四在五下，坎水下流入澤，不宜塞。五在上爲節主，四承五守制奉議，所以安亨。

九五甘節吉。往有尚。象曰：甘節之吉，居位中也。

五陽位當塞九以陽居之。又互艮以止處節之時，居尊當位，所謂數度德行之主，不傷財，不害民，篤實中。

正詳而不苛。和不苦。是爲甘節。故吉。上止下悅。守制從議。而不敢違。故爲往有尚。行下曰往。奉上曰尚。止而愈順。節之象也。象曰。六五居位得中。當節而節。故和而吉。彖所謂中正以通也。

五互爲艮。主坎遇艮。爲水土之和。有甘象。反彖辭苦節。而爲象。以明五之中正也。上議制以布下。下心悅以從上。如竹有節。上長如水下流。上盈上能不傷財。不害民。下自忘其勞。忘其死。故曰往有尚。有子謂禮之用和爲貴。先王之道斯爲美。小大由之。此也。上六苦節。貞凶。悔亡。象曰。苦節貞凶。其道窮也。

五爲節則上宜通以六居上陰虛當位然處節之極其象太過節而不節窮陰无實是謂苦節守此不變凶之道也然以節得凶悔亦可亡殆申屠狄陳仲子之流與聖人之節不傷財害民何苦之有節而太過以之爲已難久以之責人難堪所謂不可貞也故傳曰其道窮

中孚 三三 巽上

序卦傳曰。節而信之。故受之以中孚。凡事有節。則有常。可守而信。无節。則汎濫无據。而不信。故喜怒哀樂中節。則一人之情。卽天下人之情。謂之達道。達道者。信也。古人以符節爲信。以竹爲節。竹中膜爲孚。故卦象以中孚繼節。中者。孚之舍。孚者。中之郭。郭實而舍虛。故城外之郭曰郭。五穀果實。甲內之膜亦曰孚。郭以衛人。孚以藏仁。故郭內必虛。往來所以通也。孚內亦虛。生氣所以運也。中虛无物。孚信有靈。中發爲孚。孚存爲中。實生于虛。虛以孕實。實不生于虛。則其實

皆僞也。故虛无者萬事萬物之祖。詩云上天之載无聲无臭。中庸言誠又言明。誠實明虛也。故曰誠則明。明則誠。老子云无之以爲用。恍惚窈冥。其中有信。卽中孚之義。卦內三四兩偶爲虛。二五兩奇爲實。初上兩奇外包如鳥卵。鳥乳卵曰孚。字从爪从子。鳥孚以爪抱卵。悅以巽應。期而化。子從中出。故曰中孚。初上象卵甲。二五象中白。三四象中黃。卵中有虛竅。是爲祖炁。魂抱魄而成。變化虛在中。陽靈所棲也。實在外。九竅外向也。中黃化五臟。外白化羽毛。至期甲拆子飛。故初象伏雛。上象鳥成也。在人初上實爲軀。三四

虛爲心。二五實爲情。然三四同虛。有善不善。何也。善惡同出于虛。正則善。不正則惡。爻得位則正。失位則不正。初九得位爲存誠。二五得中相應爲孚。三不當位。四當位。上九陽亢外馳。故初二四五孚之善也。三上孚之不善也。蓋中虛則發中節而成孚。五資四四與初同孚于五。二應之故。五爲中孚主善也。中不虛則發不中節。如三上躁擾。驕亢孚之不善也。卦取兌巽何也。兌西。司秋。巽東南。司春。春至秋東至西。天地生物之功畢。兌往入于乾。歸于西北。化機斂藏。貞固而成孚。甲遇巽復還東南。春夏之交。鳥雀新成。黃口

習飛所以兌巽合而成中孚也。又五氣兌爲金。巽爲木。金爲木刑。造物之理。生殺相因。成毀相資。卯不裂不可爲鳥。木不剝不可爲舟。巽木之利涉。兌金之功也。故兌者毀折而後能悅。巽雞入伏。甲折而後毛羽見。故中孚取象于孚卵。小過取象于飛鳥。法象自然。非強作也。

中孚。豚魚吉。利涉大川。利貞。

中孚。孚在中也。中者孚之虛。孚者中之信。虛實相資。陰陽相抱。故曰中孚。卦以澤遇風。澤中之物順而悅者。莫如豚魚。豚魚魚之似豚者。生江水中。風至則吹。

浪水面水潛伏而豚魚應風出中孚之象巽爲風爲魚魚浮澤上兌下巽上之象豚魚无心順時含靈應氣不爽其信人苟如豚魚虛中懷信乘化以遊則吉也悅而巽无不可濟之險故利涉大川然必守正乃吉不正不可爲信如六三上九是也

豚魚江漢間謂之江猪王程諸公謂爲二物象義兼失矣物之泳游自得者莫如魚于水豚魚因風上浮故以爲風澤之象乘流湧躍天機洋溢化育流行物與无妄凡有血氣莫不含靈故以爲中孚之象

彖曰中孚柔在內而剛得中說而巽孚乃化邦也豚魚

吉。信及豚魚也。利涉大川。乘木舟虛也。中孚以利貞乃應乎天也。

所謂中孚者。兌下巽上。合二體觀。三四皆柔而在內。分二體觀。二五皆剛而得中。柔在內則虛。剛得中則實。虛則无物。實則无偽。虛以孕實。實以資虛。有无相生。誠明相待。陰陽相得。動靜相感。兌悅在下。巽順在上。合而成信。乃人君感化邦國之道。所謂中孚也。豚魚吉者。中孚爲資生之本。人而无信。不及豚魚。苟能存誠順應。天真不枯。如豚魚之應風。則吉也。利涉大川者。涉世因應。猶巽木之浮澤。虛舟順風。何往不利。

人在天中。如魚在水中。大虛流形。物與无妄。莫不各有中孚。人能含中孚之德。靜虛守正。所以應乎天而立人之道也。

曆家謂天形如雞卵。統納元氣。萬類資生。故太虛之中。莫非信也。卦體上下皆乾。天體之象。人能體中孚。自與天相似。

中孚以中虛爲象。惟虛能與物无隔。老氏謂當其无以爲用。凡有血氣。莫不舍虛。豚魚有此一竅。而況于人。故虛者神之宅也。唯道集虛。聖人无意。必固我。故能心同大虛。而應乎天。虛卽誠也。无物故虛。有信故

誠虛卽中。誠卽孚一也。子云誠者天之道。不思而得。不勉而中。虛之至也。故虛无者神化性命之本體。而世儒割之以奉二氏。其若此中孚何。論道以易爲準。百氏在宇下矣。

人生至靈。謂不及物。何也。物得孚偏。而不能自宰。如草木隨四時。乘化以運。故其信不爽。是以豚魚知風。燕知春秋。鶴知夜半。雞知旦。爰皆取象。而見人之不及也。人得孚全。故造化在我。常用其知。與造物爭智。多生僞。是反過于孚也。過乃不及。故彖傳曰。信及豚魚。言人但虛以應時。則及豚魚矣。莊生謂虛舟來。

觸人不怒者。无心也。无心自得。乃應乎天。信及豚魚之謂也。解者謂至誠格豚魚。乃吉。若是則堯舜猶病。而中孚爲絕德矣。世儒譚易迂濶類此。

象曰。澤上有風。中孚。君子以議獄緩死。

和悅巽順者。生生之心也。故卦取象于鳥之孚。子象取象于豚魚。蠢動含靈。莫不好生。是以君子惟恐傷人有罪。當刑議其獄。而緩其死。苟有可生之路。猶思保全。其中苟一毫未孚。不可施刑。此君子所爲中孚也。

風行水上。有渙散解釋之象。水族潛藏。有冤沈未達。

之象以申命寬宥之則含生歡悅矣

初九虞吉有他不燕象曰初九虞吉志未變也

初陽在下中孚之邪也其中有信而外若悶悶凝神抱一慮始謹初有虞之象虞安也慮也大學云靜能安安能慮曲禮云儼若思蓋體信之狀存誠之法也專一无他故能成信而吉有應在四故爲有他應則志分故爲不燕燕安也玄鳥之稱燕爵處堂悅入之象安靜不如燕則不成孚故爻辭戒之象曰初九虞吉者中孚貴初陽氣方潛初念純一雖有應在四絕類而上初无所繫其志未雜故能无他而虞吉也

喜怒哀樂未發之謂中。其中有信。而六爻惟初爲吉者。以初象未發。是中孚之真體也。人心常靜不失其初。則中虛而有感斯通。孚之至也。天下何思何慮。非枯木寒灰之謂。

燕玄鳥也。秋去春來。兌巽之象。一名乙乙者。物始生句屈之狀。燕來爲孚子也。故古者玄鳥至。祀高禘祈子。而人禽生子皆稱乳。乳字从孚从乙。本此燕巢堂宇。有安象。故名燕。詩云。孔燕又云。燕譽。需卦云。燕樂。皆安義也。卦體似離。離爲鳥。初爻象鳥伏子。故爲有他不燕。二象孚欲成。故云其子和。三象子在殼。故云。

得敵四象子成故爲月幾望五象雖成羣故爲變如
上象習飛故爲登天而小過遂承以飛鳥也

九二鳴鶴在陰其子和韋之我有好爵吾與爾靡之象
曰其子和之中心願也

中孚之神潛于三四兩陰中孚之應動于二五兩陽
三四陰虛象无物之中二五陽實象應物之信陰陽
動靜一原如鳥卵中黃爲陰外白爲陽魂魄相待故
曰中孚九二在內得中以陽居陰承互艮之下故爲
鳴鶴在陰鶴陽鳥高足巽象善鳴兌象前互艮有陰
象山北曰陰外與五同德二互爲震五互爲艮動止

相應中虛无礙。故爲其子和之。虛靈无物。有感卽通。仁義忠信。天之好爵。喜怒哀樂。人之達道。故爲我有好爵。吾與爾共靡費之象。靡費用也。良心藏于真陰。未動之先。以待天下之感。其象如此。爵與雀通。鳥象。象曰。其子和之者。秉彝物則。非由外鑠。中心所願。无感不應也。

二以陽居陰。在內得中。退與初比。進與五敵。應心之待感。欲動而未離乎初者也。初爲不覩不聞之地。二爲莫見莫顯之幾。動靜之介。應感之端。故爲鳴陰子和之象。大傳謂居室有善不善。而應達千里。中庸以

未發之中爲大本中節之和爲達道此也故初有未發之象二有中節之象惟有初之虞而後有二之和初若不燕二求鳴和不可得已故初言吉二不言吉以養正由初也

六三得敵或鼓或罷或泣或歌象曰或鼓或罷位不當也

六三以陰爲兌主上承六四爲巽主兩主相遇二女不同志巽順以入兌悅以出四得正而三不正三五同功欲進悅五而四與五孚阻之故其象爲得敵互震之動欲進閔四故或鼓以攻四又互艮之止畏四

履正非已所克故或罷而不攻有應在上高躁不下
敵強无援故或有時泣澤之象也巽順不害旋以自
喜故或有時歌悅之象也動靜无時悲歡失節不中
不孚其象如此象曰或鼓或罷者六三以陰居陽位
不當也夫三四陰虛本同三不當位而失常四當位
而上孚何也三不正其應在外亦不正是以佚志逐
于物也四得正其應在內亦正是以真性效之動也
善惡同出于虛飄風苦雨莫非天也天理人欲同出
而異情喜怒哀樂同發而異中是可以觀中孚矣
兌金巽木其氣相克由西反東南其行逆而三當內

外之交垂順應之常。發不中節。故方寸撓攘。變態倏忽。其象如此。鳥孕將化。有成孕者。有殫不成者。鷄音啁啾。如歌如泣。當孕甲毀折之時。其象亦如此。

六四月幾望。馬匹亡。无咎。象曰。馬匹亡。絕類上也。六以陰居四。爲巽主。柔順靜虛。以承五。內應而外孚。陰之極盛也。在人心爲致虛守靜。中孚體完。故爲月幾望之象。下乘六三。兩陰相比。如馬之匹。三躁擾搆敵。而四居正履順。上承剛中之主。安靜无競。下絕不正之朋。故爲馬匹亡之象。互震爲馬。得正上同。以陰從陽。雖盛无咎。象曰。馬匹亡者。四與三皆陰。而邪正

不同四絕陰類上從九五何咎之有三四兩偶相比
四從五則三失類故爲馬匹亡

月陰象幾望陰盛之象爻辭凡三見小畜以抗陽而
凶歸妹中孚以從陽而吉

九五有孚攣如无咎象曰有孚攣如位正當也

九五陽剛中正下乘六四靜虛內通九二中正內應
故爲有孚攣如蓋五旣得四四亦以初適五如鳥外
孚中化至五期滿子成故爻獨于五稱孚也二在內
象人性三四中虛象心五在外得中象情四德之端
也故爲有孚手相縮曰攣互艮有手象孚本无心攣

如有意然與善同情未爲咎也象曰有孚攣如者九
五以剛得正居尊爲中孚主四比之二應之所以有
孚然五四虛實得位中孚之至而皆有補過之辭何
也誠者天之道自非天下至誠未有不補過而能无
過者故三四同虛而三有不當之咎无妄卽誠閑邪
所以存誠也

上九翰音登于天貞凶象曰翰音登于天何可長也
孚以中爲信至五孚成矣上九亢而在外內應不正
之陰故疾飛叫號升于巽木之顛其聲上聞于天夫
信由衷存惟靜惟嘿厥中乃孚鶴鳴子應非以聲也

狂躁謹呼。乃喪厥孚。守此不變。凶之道也。巽伏震爲
善鳴。爲決躁。巽爲雞。爲高長。雞鳴振羽。故曰翰音。雞
不能高飛。聲高而實不從。不信之象。象曰。翰音登于
天者。以躁妄爲中孚。所謂聲聞過情。其實不繼。焉能
長久。使如初。虞无他。何凶之有。

小過
䷛
震上
艮下

序卦傳曰。有其信者必行之。故受之以小過。信者物
之性情。乾所謂利貞。卽中孚也。信在中。則行于外。過
者。行歷之迹。稟于中也。小者。初成之形。出于孚也。陰
爲小。內外二卦皆陽。而爻多陰。是謂小者過之。中孚

象鳥孚子。小過象孚成子飛。是爲飛鳥之象。始乾坤而終飛鳥。易所以爲變動之至也。中孚本離。小過本坎。離陽外朗而伏則成中孚。是離來歸坎也。坎陽內伏而飛則成小過。是坎往化離也。惟聖人信成于中。存則爲神。行應乎外。過則爲化。從心所欲。无少過差。衆人忠信不足。行乃多咎。然皆依真起妄。亦不可謂非由中孚出也。如鳥有鸞梟而爲孚。則同謂之小過者。因大過殊名耳。大過自頤來。口腹過度則有死喪。小過自中孚來。性情失常則有災眚。故小過內互爲大過。不中不信。動而不止。同抵滅亡。非謂過不可大。

而但可小也。彖謂之亨者，謂人宜收斂改悔，則自然亨通。使亦如大過之不懼无悶，其咎反甚于大過何者？大過有陽剛之才，而小過陰柔。飛揚躁擾，尤所深忌。故卦以鳥飛象過。以中孚翰音象飛鳥。按說卦震艮无鳥象，惟以由中孚巽來爲雞。上九翰音登天，雞之登天，必有挾以飛者。蓋卦體震爲決躁，艮爲指爲鈴喙，急疾利嘴長距者，其象爲鷹隼。內互巽雞，卽中孚翰音爲鷹隼所搏。故彖象飛鳥遺之音，下近地猶可救上高飛則无及矣。故解之上六射隼，亦震也。震本爲龍，艮本爲虎。今矜爪嘴之利，以搏雞雛，无復吟

嘯風雲之志。故九五云。公弋在穴。所以謂不可大事也。中二奇象鳥身。上下四偶象鳥翼。良欲止而震欲動。四陰用事。兩陽迫處凶懼之地。惟陰所往。不能自主。如鳥有身而翼挾以飛。身雖動止而動止非身。肢過于腹。末過于本。猶衰世君弱臣強。主威不振。徒倚仗股肱之力。善則爲伊周之託主。不善則爲曹董之脅君。天行之數。世所常有。而順逆之理。存乎人。彖所以謂順則吉。逆則凶也。夫鳥卽地而後得棲。近人而後得食。雖有陵風之翻。穹霄非棲息之所。故鳥飛。祇以遠害。非鳥之得常也。翼。祇以衛身。非以身從翼也。

今身不能止。惟翼是聽。翼以遠舉爲能。身欲棲息。不可得。翼飛愈遠。身愈不安。身所欲遇而求安者。翼所謂斂而无用者也。故翼利上。身利下。若伊尹周公輔幼主。造王家。可謂垂雲之羽。然治定功成。辭寵利。遂碩膚而不居。所以卒與君同其休也。曹操董卓之徒。挾尾大之勢。播遷其主。以行胸臆。至于流離落魄。身亡而毛羽亦摧。何利之有。故小過之時。下止則吉。上動則凶。取象于飛鳥之過。有所迫而往。故其過也哀。鳴急疾。天下之過。未有不戢于急疾者。士君子以恬愉爲安。以沈嘿爲養。以謙下爲度。苟飄忽如鷹隼。叫

號如鴟鵂。飛揚跋扈。動不知止。上不知下。非嘉祥之器也。詩云。有鳥高飛。亦傳于天。彼人之心。于何其臻。幽王所以亡也。故初上爲翼之翰。皆凶。二五爲翼。二无咎。下也。五雖中无功。上也。三四爲身。三艮主不能止而上應。故凶。四震主雖動而下應。故无咎。彖所以謂不宜上宜下也。

小過亨。利貞。可小事。不可大事。飛鳥遺之音。不宜上宜下。大吉。

進不遇而相失。謂之過。小陰也。爲卦四陰用事。二陽逼處于內。陽不足而陰有餘。故爲小過。陰盛故亨。然

利于守正安固。但可用柔爲小事。未可用剛爲大事也。大過宜大事。陽宜進也。小過宜小事。陰宜退也。卦自中孚來。故象飛鳥。鳥高飛而鳴。遺其音于下也。艮爲少男。互兌少女。有稚弱之象。小鳥孚成初飛。故失巢而鳴。震爲決躁。爲善鳴。上體爲震動。而多懼。下體爲艮止而得息。上互兌爲毀折。下互巽爲順入。故其象下宜而上不宜也。大爲陽。大吉與陽同吉也。陰能下。則陽得吉。上下皆由小。故小者亨。上則飛離。下則在穴。故下大吉也。

陰虛在外。陽衰失主。如一鳥過虛空。動之至微也。天

空鳥飛有亨象然焉足語大事凡過生于動動則日長止則日消君子動作小有過差宜收斂退悔苟縱情自遂其凶大矣

過有三義有過勝義陰勝陽也傳云小者過是也有過失義失于太柔也傳謂剛失位而不中是也有過往義行不相遇也傳云與時行是也過勝過失衆人有之過時不遇雖聖人不免焉周公不知兄孔子黨君惡時行之謂也若夫柴愚參魯師辟由嘑皆謂小過苟能恐懼脩省以震其无咎思不出位以止其放佚恭儉惻怛約已慎行退而改悔則亨利貞之道不

然氣質有偏駁學問有虧欠動而自用以希獨立不懼遯世无悶之勇則與大過同凶矣

彖曰小過小者過而亨也過以利貞與時行也柔得中是以小事吉也剛失位而不中是以不可大事也有飛鳥之象焉飛鳥遺之音不宜上宜下大吉上逆而下順也

小過柔勝也故柔道亨通所謂利貞者事有待過而後得正時使之然也可小事者二五得中用事皆柔居之是以小事吉也不可大事者陽失位而不得中如君弱臣強是以不可大事也卦自中孚來有飛鳥

之象鳥去惟遺其音過之象不宜上宜下大吉者鳥飛哀鳴得栖則止故過則不宜動宜止卦止動下止也既過矣愈動而上則陵陽而逆能止而下則從陽而順故大者得吉也蓋天道惡盈高者抑之下者舉之君子于小過之時能自貶損退然處不足之地使大者得安其尊居其重則可免犯順之凶茲豈獨大者之吉而已乎

象曰山上有雷小過君子以行過乎恭喪過乎哀用過乎儉

雷在天上爲大壯在山上有小過陽不足而陰有餘

也。君子觀象，寧恢廓不足而爲省約，寧枝葉不足而存根幹，行不足于奢，寧過乎恭；喪不足于易，寧過乎哀，用不足于奢，寧過乎儉，所以收斂裁抑，利貞時行，下而不敢上，順而不敢逆，以是爲小過也。

行過乎恭，震在外，恐懼之象；喪過乎哀，中互大過，死喪之象；用過乎儉，艮在內，知止之象。大過爲亂世，喪亡，故君子以濟世爲勇，小過爲一身流離，故君子以自守爲貞。

初六飛鳥以凶，象曰：飛鳥以凶，不可如何也。

鳥之過也，以飛故小過。取象飛鳥，六爻獨初上象之。

者以其爲卦之終始也。初與上如翼之有翰，鳥所以飛也。以猶用也。鳥身不能飛而以之飛者，翼也。翼亦不能飛而以之飛者，翰也。爲翰者，初上也。故曰：飛鳥以春秋傳云：凡師能左右之曰以。鳥見以于翰，以左則左，以右則右，身不得自主，蓋初與四正應，以四往者，初也。陰盛挾陽，故凶。然彖謂宜下吉，而初在下凶，何也？彖以處卦之時，言爻以設卦之象，言鳥下非一羽所能止也。象曰：飛鳥以凶者，中孚初生之鳥，利于在穴，以陰居初，當陰盛之時，身弱羽強，羽欲飛而身不可如何欲止而不得也。

大過有南北往來直過之象。小過有東西橫過之象。鳥橫飛而過。故初上同飛。所以初雖下而不得下艮爲止而不能止在人身小體。恣縱心不得主其象如此。

凡爻象多變成卦之始。象義在此一變再變。反復難定。如小過由中孚來。故初象鳥之飛。至二得位居中。則變爲人事過失。象不執一類此。

六二過其祖。遇其妣。不及其君。遇其臣。无咎。象曰不及其君。臣不可過也。

以六居二。互爲巽主。柔順中正。處小過之時。進有所

過退有所不及而皆得所遇過則不遇遇則不病其過如人往來相失曰過相值曰遇蓋其體本少男以二爲身以初爲祖以六爲妣視五爲君自視爲臣祖始也易逆數以往爲過往二則過其始矣故爲過其祖柔得柔位是遇其妣也妣者比也正應在上是不及其君也二本下是遇其臣也其過者當過也其不及者宜不及也其遇者得中居正也雖處小過之時可以无咎象曰不及其君者臣无過君之理過君則逆當陰盛之時而能不及其君順而能下所以過而不過也柔順中正殆恭儉之君子與

過而相逢曰遇。處過之時。六得二遇之象也。所以无咎。諸說紛紛。惟王輔嗣近之。妣者居內履正之象。臣者以卑承尊之象。皆謂六二互巽主在下得中。其象如此。

君子之過也。人皆見之。其更也。人皆仰之。過而遇之。謂也。外過而心仁。始過而終改。若是者。雖過必遇。惟六二得之。其不能不過者。陰勝也。其能遇者。中正也。凡人氣稟昏愚。學問生疎。皆爲小過。宜虛心下慮。反身克己。不敢寬縱。則過日消。不然則日長。馴致惡積。罪盈不復可遇矣。故彖象不宜上宜下。六二中正知。

止所以无咎

九三弗過防之從或戕之凶象曰從或戕之凶如何也
小過之時羣陰方盛九三以陽居陽弗與陰同過故
爲弗過之象三四兩陽象鳥身三以陽爲艮四以陽
爲震二主同居不同志三欲止而四欲動止則下動
則上下則順上則逆故三宜防其動也然三有應在
上與四同體苟三係于應往從則上必挾三以飛將
不免于戕害所謂上則逆也故凶象曰從或戕之者
上挾三飛則支離飄散不知所往失其止矣凶當如
何

九三以陽迫處凶地如人心危亡神不守舍耳目聲色奪以爲役桔之反覆違禽獸不遠者也鳥子失巢鷹鷂將攫而網之其象如此故極歎其凶

九四无咎弗過遇之往厲必戒勿用永貞象曰弗過遇之位不當也往厲必戒終不可長也

九四以陽居陰然未可爲咎蓋羣陰方過而四以陽剛弗與陰俱過故无咎遇陽也四得九故遇卦以下止爲吉四震主動而上行下應飛鳥之以從應飛則上逆而危必戒勿往動則變變則成謙謙止而下可免上逆之凶故彖雖貴貞四勿用永貞可也蓋不

貞惡其好上永貞惡其不變矣象曰九四弗過遇之者四柔位以柔居則與陰同過今以九居不當位所以不過柔也往厲必戒者震上往則逆動則變終不可長爲震也

處陰過之時貴得陽故三四兩陽象皆爲弗過三四爲內外成卦之主同居相持有變象三變則四爲豫主有獲而凶上逆也四變則三爲謙主勞民而吉下順也故爻義不欲三變而特欲四變于三戒以防之于四教以勿求貞傳云不可長以此

六五密雲不雨自我西郊公弋取彼在穴象曰密雲不

雨已上也

六五柔中居尊。當小過之時。陰方盛而下。與二敵應。不交。故爲密雲不雨之象。卦體本坎。坎爲雲雨。五互爲兌主。兌位西爲澤。故爲西郊。陽東陰西。陽倡陰和。乃雨。陰盛陽微。故爲不雨。陰柔雖尊。但可小事。取象飛鳥。如以公之弋。不能加高鳥于青雲之上。而但下取小鳥于穴內。蓋以主器加少男。小事之象也。穴指六二在下。五自上取之。亦不宜上之象。繫矢而射曰弋。巽爲繩。坎爲弓。有弋象。二互巽在山下。有穴象。坎爲隱伏。亦穴象。弋鳥如取。五二得中敵應之象。象曰。

密雲不雨者以柔居五其位已上陰盛之極所以爲小過也

上六弗遇過之飛鳥離之凶是謂災眚象曰弗遇過之已亢也

此所謂上逆者也陰至五已上矣又上則窮高處非其位故爲弗遇雖有應在下陽失位而艮不能止恣其躁動之性而過之以陰居末象鳥上翼之翰挾三以飛遠離巢穴飄散无歸故凶是謂災眚并至外曰災內曰眚全體俱凶妄動之過上逆之罪也象曰弗遇過之者陰至于上憑陵罔極位已亢也滅陽且以

自滅豈有鳥死而毛羽得全者乎

或曰以六居上何謂弗遇凡上窮无位陽居亦有悔
陰居尤不宜況本小過之時乎需之上六曰不當位
亦以陰居上也

既濟 三三 離上

序卦傳曰有過物者必濟故受之以既濟過渡曰濟坎險不得過必有涉險之具然後可濟如有過人之才德然後可濟世所以繼小過也既濟未濟者六十
四卦之終故取諸坎離蓋天地之用莫大于水火其
升降往來之數于坎離最著一陽交于陰中生水成
坎乾之正中也九得五在上而水流下一陰交于陽
中生火成離坤之正中也六得二在下而火炎上水
者陰中之陽精火者陽中之陰神神爲陽而在陰則
化精精爲陰而在陽則化神神故火麗于空精故水

行于地坎離者天地之大造水火者生人之大用精神者人物之大命相勝而相資水得火不寒而資生之利溥火得水不燥而烹飪之功成然造化水常資火人精不能存神何也天地坎離交而人精神不交也卦本地天泰泰交故水火濟水在地中未升于器火在木中尚離于空今取潤下者加諸火上取炎上者厝諸水下是謂既濟濟水也天一之氣洩于水元炁始化濕是人物受形之本形含虛生明神明內映則形精外朗坎水上溢生色而潤身神一息不守則精散形痿而不仁收放心以守其宅塞視聽以蓄其

明則精神合。而身中之坎離交。與天地相似。是以火
濟水也。蓋坎以陽陷陰中。內塞而外暗。反爲離。則中
虛而外朗。神明者形氣之宰。故濟坎莫如離。離在內
坎在外。明以消險。濟世成功之象也。故六十四卦首
乾坤。上經三十終坎離。以其爲天地之終也。下經三
十四終中孚小過。旣未濟。以其爲坎離之交也。天下
之事。未濟憂其不濟。旣濟則事畢矣。而无終不初。无
往不來。一治一亂者。天也。一陰一陽者。道也。天无无
陰之陽。世无不亂之治。今以爻觀六位得所。未有如
旣濟者。奇偶各三。其數均也。以陰居陰。以陽居陽。其

位當也。六爻上下剛柔相配其應正也。自乾坤來三百八十有四爻交錯徧而後得既濟。然陰陽當位則陰乘陽矣。柔上剛下。陰外陽內則倒置矣。下離而又互坎。上坎而又互離。則雜越矣。六爻一陽一陰而以陰止一治一亂而以亂止。故彖曰終止則亂。可知造化之數必无整齊完美者。非人力強排可以終濟也。又以圖數推之初剛二柔三剛四柔五剛六柔。所謂天一地二天三地四天五地六正合。然至六而止。是亦天地无完數也。所以未濟方來皆自然之法象。故衆人以既濟爲喜。聖人以既濟爲憂。

既濟亨。小利貞。初吉終亂。

水須火以致用。故水火交曰既濟。爲卦陰得位而陽皆下之。陰小陽大。故其爲亨者小。剛柔之位各正在。既濟初則吉。然天行之數。未有終吉者。苟既濟而遂已。則堯舜之後。不復有衰世矣。

彖曰：既濟亨者。小者亨也。利貞。剛柔正而位當也。初吉。柔得中也。終止則亂。其道窮也。

所謂既濟亨者。陰得位而陽能下之。小者得遂而亨通也。利貞者。剛柔各得其正。二五所居之位當也。初吉者。以柔居二。雖其乘剛得中而吉也。至以柔居上。

乘剛不變則終止而亂其道窮也吉者離之明也亂者坎之險也六爻皆柔上剛下在二則中在上則窮故未濟將至矣

大傳曰一陰一陽之謂道先陰而後陽者造化由靜而之動二氣循環非謂一定不易也雜卦傳曰既濟定也六爻陰陽各得位而易終矣有終止之象止則陽居陰下水不得還源火不得麗空變化不行故亂蓋坎離者天地之中氣造化由中分中故不測其變不滯滯則災故曰止則亂不息則其道不窮矣象曰水在火上既濟君子以思患而豫防之

水在火上。是水得火以濟其用也。然水性下流。濕能勝燥。火居其下。有受滅之勢。君子觀象思患而豫爲之防也。坎險在外。防患之象。離明在內。豫思之象。終止則亂。其象如此。

初九。曳其輪。濡其尾。无咎。象曰。曳其輪。義无咎也。

初九既濟登岸之始。曳。牽也。坎爲曳。爲輪。離爲牛。初奇象輪。二偶當前象牛。蓋既濟而牛。曳車以升也。濡其尾。水濕牛尾也。既濟而濡其尾。何咎之有。象曰。曳其輪。則車將絕水。就平地矣。其義无咎。

六二。婦喪其茀。勿逐。七日得。象曰。七日得以中道也。

六二陰柔中正成離之主是爲中女有婦之象上應九五爲坎坎爲盜爲輿有喪失其車弗之象婦人車上有蔽曰弗喪弗无蔽離虛之象當旣濟時恆情以爲安車載道而无平不險反喪其弗諺云涉風波不懼履平地而恐此之謂也然六二中正安常履順雖失必得故爲勿逐六爻往而復來凡歷七位故爲七日得至未濟之九二陽實居中得弗之象曰離象也象曰七日得者由二往上復來未濟之二遇剛則二之中自在也所以得弗

九三高宗伐鬼方三年克之小人勿用象曰三年克之

億敗也

九三離終遇險之交水火相射離爲兵戈有克伐之象三居離上有高象離麗有宗象與上正應上居坎極坎隱有鬼方之象故爲高宗伐鬼方高宗商王武丁也中興壽考既濟之主鬼方幽州商頌所謂氏羌西北夷也以明化險進遇重坎蹇蹇終濟故爲三年克之之象陰柔爲小人三以陽剛承乘皆陰互陰居中欲變而之上故爲小人勿用之象象曰三年克之者師徒久頓力疲億也蓋上遇重坎下互重離燥濕相持中興既濟克艱如此

離中稱宗同人六二睽六五皆是也此九三高于二故爲高宗之象離戈爲武天干丁爲火故有武丁之象自三之上爻隔爲三三變互坤坤偶數十二爲年火與水接爲克之象

濟火濟水也坎隱須明以辨之故旣未濟二卦皆以離化坎君子明善以誠身致知以誠意所以爲易道之終也

下篇之卦多風雷山澤然皆乾坤坎離之變也旣濟三伐上三上動則水火變風雷其卦爲益君子所以遷善改過也雷風不易而水火易位能遷改則適炎

上就下之常。未濟四伐初。初四動。則火水變山澤。其卦爲損。君子所以懲忿窒欲也。澤山虛受而火水不交。苟能懲窒。卽是水升火降之理。故二卦三四兩爻往來。其象亦相似。皆以離化坎。以水火化風雷。山澤應咸恆。而爲下經之終也。蓋德莫大于誠明。功莫要于遷善改過。與懲忿窒欲。故乾坤變化莫妙于坎離。上經卦三十。乾坤而下。奇偶各三十。遇否泰而終坎離。以坎離爲否泰之交也。下經卦三十四。咸恆而下。奇偶亦各三十。遇損益而終。旣未濟。以損益爲旣未濟之變也。天運莫大于否泰。人事莫大于損益。

二卦皆伐鬼方。既濟獨言憊何也。坎水在上。防患制勝難。離明在上。居方辨物易。既濟之時。卽安求益難。未濟之時。履險思損易。二卦皆以險爲主。以明爲用。既濟險在上。故爻象上往。未濟險在下。故爻象下來。既濟險在外。故上卦有未濟之象。未濟險在內。故上卦有既濟之象。

六四。繻須有衣袽。

女平聲

終日戒。

象曰。終日戒。

有所疑也。

初已濟而四復遇險。所謂思患豫防也。將涉揭裳。故爲繻有衣袽之象。繻。文繒也。離象與襦通。褻衣也。記曰。衣不帛襦袴。又曰。不涉不褻衣。四遇坎水。將涉。

揭襦而見其袽。袽褻通衣。敗褻褻也。外繻而內袽。亂伏于治。坎隱之象。坎險。故終日不忘戒。四多懼之象。象曰。六四所以終日戒者。陰柔不中。處多懼之地。承乘皆剛。互坎雜離。一自以爲火。一自以爲水。一自以爲旣濟。一自以爲未濟。故疑而終日戒也。夫以旣濟之時。坎險在外。天下所以无安不危耳。

卦本泰體。乾坤爲衣裳。坤爲帛。互兌毀折爲袽。離爲日。四在離外。終日之象。

九五東鄰殺牛。不如西鄰之禴祭。實受其福。象曰。東鄰殺牛。不如西鄰之時也。實受其福。吉大來也。

九五爲坎主。下應六二剛柔各中正。皆善處旣濟者也。然二以陰虛文明。无心而喪其弗。五以剛中處險。有坎之憂。心恐懼脩省。恭敬神明。是能盡憂危之道。銷患蒙福者也。二之安行。不如五之憂危。故爲東鄰殺牛。不如西鄰禴祭。受福之象。東謂二。西謂五。東左西右。左後右前。故內卦爲左。外卦爲右。坎在外爲西鄰。離在內爲東鄰也。離爲牛。爲兵。坎爲血。有殺牛之象。禴。薄祭也。亦作杓。夏祭曰禴。水瀹菜以祭。坎水之象。牛豐水儉。豐不如儉。言二不如五。懼以獲福。旣濟。貴不忘險也。實陽象。坎滿爲實。象曰。離之殺牛。不如

坎之用禴蓋牛于坎冬祭則宜離爲夏宜禴而殺牛所以不如五識時也處盈能約旣濟憂不濟斯爲識時能約則常盈能損則常益是以九五實受其福吉慶大來爲旣濟之賢主也

六二在離爲乾卦之主乘初曳輪登岸卽陸大難旣平文明方新故爲殺牛豐盛之象也九五在險爲加憂小心敬慎故爲禴祭貶損之象也禮四時之祭惟夏不備物惟冬大烝故書洛誥烝祭文武騂牛各一是也時安不如危時豐不如儉人情生于憂患而死于安樂其象如此

上六。濡其首。厲。象曰。濡其首厲。何可久也。

六以陰居險上。既濟之終。所謂止則亂也。已出險外。而陰柔不正。下應九三。窮極必反。故爲濡其首危厲之象。初之濡尾。自水升陸也。上之濡首。復自陸入水也。盛而復衰。循環之象。象曰。濡其首厲者。一治一亂。理數自然。以陰居上。何可久也。故序卦受之以未濟。

未濟



坎下離上

序卦傳曰。物不可窮也。故受之以未濟終焉。何謂其物不可窮也。造化之理。无往不復。治亂相循。終則有始。既濟則功已畢。未濟則事復始。有生生之義。生生

之謂易。所以終未濟也。既濟水在上。勢欲下。火在下。勢欲上。二氣參和。故曰既濟。未濟則炎上者升。上流下者反下。分背不交。故曰未濟。既濟交致其用。未濟各安其宅。致用者用有時。輟安宅者待用无方。所以爲生生不息也。故初六濡其尾。欲濟不果。回首而濡其尾也。六四未濟利涉大川。是猶未嘗涉也。然水火不交而爻象視既濟吉。何也。既濟之火水在鼎鑊者。也。未濟之水火奠位上下者也。在鼎鑊者質交而氣雜。奠位者體靜而得常。故爻象多貞吉。九四頌其功。六五美其德。未濟六五爲諸卦五位之終。乾九五爲

諸卦五位之始。乾九五爲大人之見。未濟六五爲君子之光。離明卽乾知。在人爲明德。三才之本。大易之元。所以示人極于爻位之終也。上九飲酒。則人心陷溺。不能濟者。所以于爻終示戒也。大抵坎離皆天地之中。而離爲日。離明。坎暗。離虛。坎實。德莫妙于明道。莫神于虛。故坎降而離升也。坎爲精。而離爲神也。坎爲形。而離爲心也。坎隱在內。離明在外。日麗天水行地。乾坤正位。法象之自然。雜卦傳曰。男之窮者。坎歸下也。男下女。化生之本。其窮也。所以无窮也。故乾坤交而成坎離。坎離交而成旣未濟。坎離變化成中孚。

小過中孚離中有離小過坎中有坎既濟上坎互離
下離互坎中復互未濟未濟上離互坎下坎互離中
復互既濟既濟水火交未濟不交而男下女亦交也
陰陽兩在无方水火互藏其宅故上經首乾坤者陰
陽之正也以水火之正終焉下經首男女者陰陽之
交也以水火之交終焉首乾坤者兩儀所以立終中
孚小過既未濟者變化所以行也

未濟亨小狐汔濟濡其尾无攸利

坎險在內故爲未濟火水各居其所亨通之道狐
善濟水其性多疑小者未習險及濟不敢濟回首而

還水濕其尾。未濟之象也。坎爲隱伏。爲狐。爲多心。有
疑象。凡濟貴謀。惡疑。有剛明之大德。乃克濟。以小狐
處險。故无攸利也。汔近也。猶井卦汔至。亦未繙井之
汔。近水未及濟也。

河水冬凍合。狐聽冰下。无水聲。乃濟。故彖以小狐象
全卦。爻以初六象小狐。

濟以明濟暗。以知濟險也。卦體險暗在內。明在外。有
未濟之象。人身離爲神。坎爲形。離火屬心。坎水屬腎。
神潛于形。心氣下交于腎。而後火降水升。彖謂无攸
利。以坎也。其亨。以離也。故爻象四與初變。而後坎離。

交

彖曰未濟亨。柔得中也。小狐汔濟。未出中也。濡其尾。无攸利。不續終也。雖不當位。剛柔應也。

彖謂未濟亨者。離在上而五得中。居尊應剛。以明燭險。故亨通。小狐汔濟者。時處未濟。小狐欲濟。未能出中。達于險外也。濡其尾。无攸利者。才弱識暗。思濟不果。終不繼其始也。六位皆不得正。然二五居中。剛柔相應。有共濟之道。所以雖未濟而亨也。

卦受既濟。既濟之上六。濡其首。有汔濟之象。來爲未濟。有回首不果濟之象。故云不續終。

象曰火在水上未濟君子以慎辨物居方

火炎上水流下各有自然之性既濟交錯以致其用而物類有方不可易移君子觀象于未濟審慎以辨物之性使各居其所而不相雜操則羣分類聚无侵陵剝蝕之患矣辨物離明在上之象坎爲隱爻辭所以謂之鬼方也惟君子以離明辨之

初六濡其尾吝象曰濡其尾亦不知極也

初六在既濟上濡其首有入水之象今來下居初陰微狐疑汔濟不濟有回首濡尾之象中无定見所以羞吝濡濕也坎水之象卦後有尾象象曰初濡其尾

者處未濟之時。坎下最幽。去明遠。不知之極也。知明也。極至也。惟明能知險。不知極。卽彖所謂小狐者也。惡能濟。

彖云小狐濡尾者。全卦之象。然行止分于初。故爻卽以初陰象小狐。或謂濟而沒其尾。然則凶甚矣。何但吝而已。卦爲未濟。何以初遂得濟。初濟何以三尚言未濟。在未濟時。下坎三爻皆未嘗濟也。卦所以善者。正惟其不輕濟。故大象有慎辨之說。初之過在不知。而不在不濟。知者處此。自不妄濟。何待濡尾。初在險下。去離明遠。所以幽昏之極。必明克而後濟。九四所

以伐鬼方也。初六思濟不能濟也。九二能濟不欲濟也。六三不可濟而強欲濟也。

既濟之初濡尾者。離在下。牛尾之象。已濟而登陸也。未濟之初濡尾者。坎在下。狐尾之象。不濟而回首也。○道以明爲大學。以知爲本。致知所以存誠。立誠所以養明。坎實爲誠。離虛爲明。既濟由離之坎。自明而誠。人道也。未濟由坎適離。自誠而明。天道也。故既濟水火交而人力勝。未濟水火分而造化見。爻辭于初六譏其不知極。愚者不及也。于上九責其不知節。智者過之也。二五貞吉。有中行之實。煥君子之光。致知

明德之要皆不外是矣

九二曳其輪貞吉象曰九二貞吉中以行正也

九二以剛居險中處未濟之時知止不濟故爲停車
曳輪之象可免漸帷濡軌之患故得正而吉象曰九
二貞吉者未濟之時不濟爲正雖以剛居柔而履中
則行正故能不違時輕進也上與五應志雖相得四
五方互爲重明二在坎中又互重險必四變而後二
五得通也

輪坎象車行以輪旣濟曳輪將登岸也未濟曳輪止
不行也

人心中虛无物。然後水火交。水火中氣虛爲中體。陰虛陽實。四以一陽隔于上下之間。如人心有物在中。則魂魄不守。四不變。則二五不得交。處未濟之時。其象如此。故二以不進爲正。

六三。未濟。征凶。利涉大川。象曰。未濟。征凶。位不當也。三居坎終。當外之際。處未濟之時。乘險未去。故爲未濟。以柔居剛。外與明接。有應于上。故欲往。然濟則能往。未濟焉往。四以剛阻其前。互爲重坎。征則凶。然四將變。則中互震。乘木濟虛。往入離鄉。无復限隔矣。故利涉大川。象曰。未濟。征凶者。以剛居柔。位不中正。所

以進遇重險未可往耳

初二皆未濟獨于三言之者以三近外有濟之疑也
在未濟時終未得濟卦體離明有下濟之象而炎上
就下分背不交三四兩爻上下相拒故三爲未濟而
來九四之震伐也蓋卦自初至五互爲重坎六三卽
所謂來之坎坎入于坎窞者焉得濟凡爻象陰虛當
前則通陽實當前則塞四以剛爲重險處未濟之時
三豈有濟理利涉大川者以四變則體似中孚故其
象與中孚之彖辭同朱子謂行者可舟浮不可陸走
以此解象如說夢耳

九四貞吉。悔亡。震用伐鬼方。三年有賞于大國。象曰：貞吉悔亡，志行也。

九四以剛乘險暗之上。居離之始。不中不正。互爲坎主。其體本離。又互重離。故其象欲變。然以陽明之資守正自吉。而悔可亡。下與初應。初處暗極。不能自濟。居坎之北。有鬼方之象。四以離明下濟。九來居初。六往居四。則中互爲震。三五互爲坤。坤爲年。爲大國。卦變損爲二簋用享。坎爲酒食。爲車馬。震爲玄黃。爲筐篚。故有賞功之象。四爲公。公爲大國。故爲有賞于大國之象。言四有克鬼方之功。而五賞之。皆變象也。象

曰貞吉悔亡者九四以陽明濟險專精致力能馴小
狐之无知使山澤通而水火濟其志得大行也

坎本幽暗故象鬼方既未濟二卦皆以離化坎既濟
之離三往伐上火化雷水化風其卦爲益君子所以
遷善改過也未濟之離四來伐初火變山水變澤其
卦爲損君子所以懲忿窒欲也以剛居四互坎爲憂
心忿象也以柔居初坎爲溝瀆欲象也損四以平其
心病益初以塞其尾閭則震木中虛而水升火降九
四震伐之功大矣然未濟自上伐下何也險在下明
在上故能慎辨四不伐初則明不下濟而小狐攸伏

四不變則二不得與五通四變明以止則初化而上亦賴以免于濡首不失其是故懲忿窒欲皆震伐之功也

聖人雖愛陽而其于坎未嘗不惡之雖抑陰而其于離未嘗不喜之蓋坎陽與陰爲險也離陰與陽爲明也既未濟二卦水火之交而三四兩陽各互重坎于中此卦體所惡而欲變也三四變則中虛水火化風雷薄山澤通天地之間所以爲大虛也故聖人貴誠亦貴虛道以虛爲至讀易者當默識也

六五貞吉无悔君子之光有孚吉象曰君子之光其暉

吉也

六五離明得中居尊當未濟時水安流于下曰靜照于天五以柔順居中无爲故其象貞吉雖以柔居剛而溫順謙虛與九二剛中正應內篤實而外文明故爲君子之光陽明爲君子陰麗陽生明也明而不炫兼照而不自用故曰君子大明方中此九二晉承休采之曰故爲有孚吉貞吉者五得正而吉也有孚吉者六二交映而吉也象曰君子之光者二五相得坎承離明離資坎潤暉映發越清通而不可揜故吉光彩旁達曰暉日映水之象釋爻辭有孚吉之義

九二貞吉。以不濟爲正。幽人之吉也。九四貞吉。以志行爲正。臣子之吉也。六五貞吉。以虛受爲正。君道之吉也。人主心虛。故同人无我。大舜好問。成大知。四目四聰。然後爲君子之明。坎險隱伏。豈一人耳目所能徧。天下之聰明集。而後天下之肺腑通。此大人之明德也。權謀私智。何能及此。故未濟九五爲六十四卦九五之終。得當離明。爲君子之光。德莫盛于明。業莫大于光。離日正中。坎孚盈缶。所以吉而又吉。與乾九五大人相爲終始也。

六五君子之光。以有九二爲內應。亦賴九四爲震伐。

也。鬼方之隱微而後離明之光融。險陷平中孚成。然後上下交而坎離合成。空明澄徹之體。不然二未能與五通也。故君子以損爲濟。未有不懲忿窒欲而能光明者也。

易之爲字。从日月也。往來貞明莫大乎日月。離爲日。坎爲月。卦體卽易象。故以終易。曾子曰。江漢以濯之。秋陽以暴之。孟子曰。觀水有術。必觀其濶。日月有明。容光必照。旣未濟之象也。

旣濟水欲下陷。故離防其患。而九五受福。未濟水不得上升。故離辨其隱。而六五有光。

上九有孚于飲酒无咎濡其首有孚失是象曰飲酒濡首亦不知節也

未濟至五盡善矣上九過剛不中下孚六三不正之險非二五君子之孚乃孚于飲酒而已水遇火有飲酒之象然其應非不正飲酒宴樂亦君子所不廢故无咎但六三陰柔在險征凶而上九以躁急思往應有沈淪下陷濡其首之象以此爲孚昏迷不醒必自喪其明是指離明也蓋君子之光不獨六五有之人皆有之操則存舍則亡彼昏不知所以失是耳象曰飲酒濡首何陷溺至此乎惟其昏迷不知節也是非

之心人所固有六五唯得中故其暉吉上九唯无節故以口腹喪志所謂无是非之心非人者也欲爲君子可以不知節乎

人心之明莫妙于知迷心之毒莫甚于酒坎水險暗故以象之物欲迷心莫非酒也人能不爲酒困則神明常主是故大禹序疇而惡旨酒周公繫易而作酒誥詩云人之齊聖飲酒溫克彼昏不知一醉日富故嗜慾溺心甚于泮水與其溺于慾也寧溺于淵此之謂也然爻辭云无咎何也天理人欲非二靈知常主操之有節則食色亦天性昏迷不省放而无節則聰

明卽聲色。故曰養心莫善于寡欲。知節之謂也。不然聖人豈責人絕飲食爲君子乎。

貴而大者。心志也。離在上之象。賤而小者。口腹也。坎在下之象。飢渴害心。以險陷明之象。神明常主飲酒。知節之象。是以九五得中。爲君子之光。上九不知有失。是之迷卦。所以必欲變而之損也。能損則知節矣。○喪明而曰失。是何也。同然之謂是。虛靈人所皆有。猶漆雕開之言。吾斯也。韓愈云。堯以是傳之舜。舜以是傳之禹。文武周公孔子孟軻相傳。皆以是也。失是則人无以異于禽獸。上九不知節。故濡其首。初六

不知極故濡其尾。人之與狐相去幾希。唯其知與不知耳。人能知節以養其光明。則何險不濟。故易險在人心而已。此不息之明。无窮之源。聖人繫之易終其旨微矣。

易象有辭若確而義實无據者。旣濟六三。高宗伐鬼方之類是也。有辭若泛而義甚切者。未濟上九。孚于飲酒之類是也。凡觀象過則鑿。淺則離。微顯中情得象斯得易矣。

或問易終旣未濟何也。蓋易雖不爲養生作。而三才之理皆備于人人。身抱坎離而生。心爲離。腎爲坎。心

藏神。腎藏精。水火之象。心居前。腎居後。南北之象。心含血。腎含氣。交濟之象。水升火降而生呼吸。一吸起湧泉。升尾閭。緣督而上。泥丸。復自泥丸降。顛門。循鼻竅。灌咽喉。注中黃。落丹田。消于氣海。是爲一呼。一呼一吸。是爲一息。晝夜凡三萬三千六百餘息。此乾坤定位。日月周旋。坎離升降之象。故說卦以首象乾。以腹象坤。心腎得位。神氣清寧。水火各司其官。則上離下坎。未濟之象。神氣配合。升降有度。蓄洩以時。則坎上離下。既濟之象。故未濟汔濟。既濟終亂。生死之關。小過大過。皆係乎此。蓋水火二者。乾坤之中。炁相通。

而爲山澤相薄而成風雷男女之感欲惡之動皆從此出是以心爲主宰而腎爲溝瀆火爲文明而水爲險陷離象大人而坎象寇盜也人能懲忿窒欲則未濟之九四變而之初山澤爲損降火滋水之象能遷善改過則旣濟之九三變而之上風雷爲益用火煉水之象如此則坎常滿而陽純成乾離常虛而陰定成坤天降地升交泰之象苟上下之間不能損益旣未之際不能相濟則坎離不交火上炎而陽亢成乾水下流而陰涸成坤天地隔絕而爲否塞之象故乾坤坎離咸恒六卦三才之全體旣未濟損益泰否六

周易正義 卷二十一
卦三才之妙用上經首天地歷十卦奇偶三十畫而
遇泰否下經首男女歷十卦亦奇偶三十畫而遇損
益人道三十而壯四十而強之象坎離當六十四中
央綰轂三才之運既未濟居六十四之後曲成三才
之終也故觀易道者觀之人身而可知乾坤等十二
卦圖詳見說卦

周易正解卷十七下經終